


**TRUTH
CENTERED
TRANSFORMATION**

MODULE



**OKUTUURAHOKU NK'OKU
RUHANGA AGYENDEREREIRE
AKATABO
K'OMWEGYESA**

Truth Centered Transformation—Module: Okutuura ho nk’oku Ruhanga Agyendereire v3.2 Copyright ©2018
Reconciled World, Phoenix, Arizona, United States of America. www.reconciledworld.org

Omurimo ugu nigategyekwa ahansi y’ebiragiro bya creative attribution -Share Alike 3.0 license Noikirizibwa kandi n’ogarurwamu amaani kukwata omurimo ugu okagugabira abandi kandi okagujanjaza ahansi y’ebiragiro ebi:

Okujuriza Omurimo – oshemereire okworeka ugu omurimo bati: Copyright © 2017. Efulumiziddwa Reconciled World (www.reconciledworld.org) aha biragiro by’orusa rwa Creative Commons Attribution–ShareAlike 3.0. okumanya ebirukir’aho, orebebe www.creativecommons.org

Tibyabushubuzi – Torikwikirizibwa kukoresa ebiri omumurimo ugu ahabw’amagoba.



Kuwokuba nooyenda okuhindura omurimo omururimi orundi, nyabura otuhandikire aha info@tctprogram.org.

Ebyahandikirwe byoona bijuriziibwe okuruga omu, Baibuli Erikwera, The Bible Society of Uganda, 1964.

Ebirimu

Amashomo omu kicweka A ninka ag'eshaaha 1 buri rimwe. Nigabaasa kukoze sibwa buri wiiki omu bubiina bukuye omu kutendeka ba memba b'ekanisa yaawe. Ekicweka B kigyendereire kuhwera ekanisa yoona kushujuma oku baarikugyenda omumaisho kuruga aha kutandiika kwa puroguramu ya TCT, okujaguza byoona ebi Ruhanga akoziire, kandi n'okukora enteebekanisa y'okugumizamu omumaisho omu kureeba empinduka. Nikirungi munonga okuteebekanisa eizooba rimwe ryoona kumaririza obucweka bubiri oburi omu kicweka B.

EKICWEKA A	1
Eishomo 1: Ahabw'enki Tushemereire Kworobera Ruhanga?	1
Okwanjura	1
Okwetegyereza Amakuru g'Okujunwa	1
Nitujunwa tuta?	4
Eishomo 2: Nitushabwa Okukora ki?	6
Okwanjura	6
Okukunda Bataahi Baitu	6
Okuta Baibuli Omubugufu	7
Eshonga z'okutakunda abandi	7
Eishomo 3: Nitubaasa Okuhwera Tuta?	9
Okuhwera Abandi	9
Eishomo 4: Obukama bwa Ruhanga	12
Obukama bwa Ruhanga	12
Ekitabo kyaitu ky'engyendererwaho	12
Okukura nk'oku Ruhanga Agyendereire	13
Eishomo 5: Amatsiko Ga Nyensya	15
Engiri omu Bwijwiire	15
Okugarukanisa Ebintu Byoona	16
Oku waakuba Orikwombeka Obukama	18
Eishomo 6: Kozesa Byoona Ebi Ruhanga Akuheire	19
Emigane Eshatu ya Baibuli	19
Ruhanga Naabazamu	22
Eishomo 7: Okore Okureetera Ruhanga Ekitinisa	23
Ahabw'enki twiine Okukora?	23
Ruhanga Naata Omutima Aha kuturikukora Omurimo Gwaitu	23
Okuhiinga ahabw'Okuhereza Ruhanga Ekitinisa	24
Eishomo 8: Amazima Ahari Sitaane	26
Sitaane n'Omubeihi	26
Amazima ga Ruhanga Nigaija Kutuhindura Ab'obusingye	28
Eishomo 9: Okuhindura Abandi Abeegi	30
Okuragiirwa Okukuru	30
Obe Eky'Okureeberaho Kirungi Ah'abandi	30
Okuba Ow'omushana	31
Eishomo 10: Reteera Ruhanga Ekitinisa	33
Obukuristaayo n'enki?	33
Seduraaka, Mesaaki na Abedeneego	33

Okworeeka Ekitinisa kya Ruhanga	34
Eishomo 11:Tushemereire Kukora Tuta Ebintu Ebi Byoona?	36
Okwanjura	36
Ekitabo ky'Ebyakozirwe Entumwa	37
EKICWEKA B:	38
Akacweka 1: Ahu twaahika Nihaingana Ki?	38
Ahutwaahika nihaingana ki?	38
Empinduka Ezirikukira Kubaho	41
Okuta Omunkora Ebitwegyeire	42
Nitwenda ngu Tuze Nkahi?	42
Akacweka 2: Okugyenda Omumaisho	44
Ebicweka byoona bikwaatanisibwe hamwe	44
Okutendeka	44
Ebikorwa bya Rukundo	46
Okuguma Omuriwe	47
Entambwe erakurateho neeha?	47

Otakatandikire

Okweteebekanisa Kwegyesa Eishomo

1. Shoma omu **Katabo k'omwegyesa** n'obwegyendesereza, emirundi maingi kyaba nikibaasika. Omaakinge nari ohaandiike omurubaju rw'empapura kugira ngu oyeyijutsye ebintu bikuru.
2. Oreebe ahari **enshonga enkuru** eza buri eishomo kugira ngu omanyeye eki abeegi bashemereire kweega kurabira omu eishomo.
3. Shoma **ebyahandikiirwe** byoona kare.
4. Okyebere kureeba ni **ebikozeso** ki ebirikwetengwa ahabwa buri eishomo kandi okore n'ebishushani by'okureeberaho ebirikwetengwa omu eishomo. Nobaasa kusharamu kuhereza buri Kanisa Akatabo k'Omweegi kubahwera kugarukamu kandi n'okuta omunkora ebi beegire. Waaba otakozeise Akatabo k'Omweegi, nobaasa kuhandiika ebyahandikiirwe hamwe n'ebibuuzo aharubaho nari ahabupapura bukye ahabwa buri kibiina ky'abantu.
5. Gyezaho kureeba ngu omanyiriire buri **murimo** omu eishomo (emizaano, obuzaano bugufu ebishushani by'okureeberaho). Nobaasa kubyegyezamu n'ab'omuka nari banywani baawe.
6. Twaara obwiire **kushaba** kugira ngu Ruhanga ateebekanise abeegi, kugira ngu abeegi bahuriire eki Ruhanga arikwenda ngu bahuriire, kandi n'okugira ngu akuhwere kwegyesa. Oijuke ngu n'okurabira omu maani ga Ruhanga gonka kugira ngu tureebe abantu nibahinduka.

Oku Orikukozesa Akatabo k'Omwegyesa aka

1. **Enshonga enkuru hamwe n'Ebikozeso:** Buri Eishomo niritandiika n'ekicweka eki.
 - a. **Enshonga Enkuru** – Ebi n'enshonga nkuru munonga ezi abeegi bashemereire kwetegyereza gye barikuhika ahamuheru gwa buri eishomo. Ahamuheru gw'eishomo, twaara obwiire kubigarukamu kandi ogyezeho kureeba ngu abeegi baabyetegyereza gye.
 - b. **Ebikozeso** – Ebikozeso byonyiine ebirikwetengwa bihandikiirwe ahabwa buri eishomo.
 - i. **EBISHUSHANI BY'OKUREEBERAHO** – nibyaija kuba bihandikiirwe biti. Bishemereire kwiihwamu bukiri kare.
 - ii. Nitugiira ngu nikirungi kugira empapura mpango nari orubaho eby'okukozesa omu kibiina kihango.
 - iii. Obutabo bw'abeegi tiburi eiteeka. Ekicweka kyoona omu eishomo ekyeine empapura zirikwikirizana omu katabo k'abeegi nikyorekwa omu katabo k'omwegyesa nka bati: **(SG)**.
2. **Oku Omwegyesa Aratwaaze:** Ebi n'eby'okukuratira bikuru omu eishomo kukuhwera kwebembera gye okutendeka. Ebi tibiri by'okubagana n'abeegi. Obishome kare kugira ngu obe oyeteebekanise gye kwebembera okuhaana ebiteekateeko hamwe n'emirimo. Ebibuuzo bimwe nibyaija kuba byeine eby'okugarukamu kuhwera iwe nk'omushuganisa kumanya ebi oraayihe omu beegi. Ebi tibyo by'okugarugamu birungi byonka, kureka ni bimwe ahaby'okugarukamu birungi.

EKICWEKA A

Eishomo 1: Ahabw'enki Tushemereire Kworobera Ruhanga?

Enshonga Enkuru

1. Yesu akatukunda munonga yaafa aha musharaba okutwaara ekifubiro ekyabeire kitushemereire.
2. Amagara gaitu gashemereire kuhinduka twaamanya omuhendo hamwe n'amakuru g'okufa kwa Yesu aha musharaba.

Ebikozeso

1. Ebishushani by'okureeberaho: Akazaano k'omwikiriza musya(oihemu kopi emwe kandi ogisharemu kabiri)
2. Akatabo k'omweegi (ti eiteeka): Omugane gwa Yuda (SG)

Okwanjura

OMURIMO OMU KIBIINA KIHANGO (AKAZAANO)

Oku Omwegyesa Aratwaaze: Shaba ba nyekundeire 2 okukora akazaano aka (**EKISHUSHANI KY'OKUREEBERAHO** Akazaano).

Omwikiriza Mukuru: Mbwenu hati obu ori omwikiriza, oshemereire kushaba, okashoma Baibuli burizooba, okaza omu kanisa, okegaita aha kibiina kikyey'okweega Baibuli omurundi gumwe omu wiiki. Nootekwa kureka okureesa hamwe n'okunywa amara.

Omwikiriza Musya: Ka ni byingi! Naaba nintekateeka ngu ninyetenga okushaba n'okwikiriza byonka kugira ngu njunwe. Okwo nikwo waaba waangambiire!

Omwikiriza Mukuru: Ego, konka hati nootekwa kukora n'ebintu ebi byoona.

Omwikiriza Musya: Ahabw'enki? Nintekateeka ngu naahereize kujunwa. Ninyenda kuza omwiguru, nikyo kyonka. Tindikwenda kuhindura omuringo ogu ndikutuuramu.

OKUHAANA EBITEEKATEEKO OMU KIBIINA KIHANGO

- Nooha ohikire omu kazaano aka? Nitwetenga kukora ebintu byingi nari n'okushaba hamwe n'okwikiriza kugira ngu tujunwe?
- Kuri niwe waabeire ori Omwikiriza Mukuru, okaagambiire ki Omwikiriza Musya?
- Waarabugeineho omwikiriza orikuteekateeka omu muringo ogu?

Okwetegyereza Amakuru g'Okujunwa

OKUHAANA EBITEEKATEEKO OMU KIBIINA KIKYE

Oku Omwegyesa Aratwaaze: Shoma Omugane ogu reero ohereze obubiina bukye ebibuuzo by'okuhaanaho ebiteekateeko. (SG)

Hurikiza omugane gwa Yuda. Mubagane eby'okugarukamu omu bubiina bukye reero mwaheza mubagane n'ekibiina kyona.

Omugane gwa Yuda:

Bury'omwe aha kyaaro akaba naamanya ngu n'omuntu mubi. Yuda akaba ari memba w'ekigombe kibi kandi omusinzi. Tihariho owaabeire nabaasa kwijuka arikumureeba ari omu buteeka, akaba atuura asinzire. Akaba ajuma omukazi n'abaana, atarikubaasa kubahwera omu musiri kandi akaba naatinwa abantu baingi. Akaba agyendana omusyo kandi agukozesa kwiiba abantu. Ku yaabeire ahika omu mbeera mbi, akaba ayotsya amaju g'abantu. Abaporiisi bakaba batarikubaasa kuyamba; naabo bakaba nibamutiina. Hakaba hatariho kihango eki omuntu weena yaabeire nabaasa kukora. Boona bakaba nibamweganya.

Konka hati akaba yaakikozeire. Yuda akaba ayitsire omuntu- haza omuriisa mazima! Okurugirira ahari abo abakireebeire, omuriisa Matayo akaba yaaheza kumara orukiiko gw'ekanisa kandi arikutaaha omuka. Yaakinga ekanisa kandi akaba naacuriza omu kyeshongoro eki baabeire baaheza kweshongoro omu kanisa obwo arikutaaha omu nju ye nk'entambwe nkye munonga. Yuda akaba arikunywa amara ge kandi yaagirira omuriisa ekiniga ahonaaho ahabw'okucuriza. Akarumba omuriisa Matayo n'omusyo reero bwanyima yaahunga. Bury'omwe omu baara yaimuka kuhwera omuriisa konka kubagiire kumuhitsya omu eirwariro nka milo 20, yaaba yaafiire.

Orufu rukaba orw'obusaasi. Omukazi we akaba aine abaana 7 b'ahagati y'emyaka 2 na 15. Akaba ataakareeka kurira. N'obu yaabeire naamanya ngu omushaija we ari omwiguru na Kristo, akaba areengyeirwe okuhwa amatsiko ahabw'embeera ye. Akaba naija kuriisa ata abaana be? Bakaba nibaaza kubaho bata? Ekanisa ekabahwera konka boona bakaba bari abahingi kandi abooro. Akaba naamanya ngu omu myeezi mikye, ebiconco by'omuceeri n'esente kuruga omu bantu hamwe n'ekanisa nibyaija kuhwaho reero atsigaze busha shana amabanja ahabw'orufu. Yaareeba Tomasi omwojo weye omukuru. Akaba ari omwojo murungi, arikukunda kuhwera n'obu banywani be baabeire barikwenda ngu bazaane, konka shi akaba naaza kumutungaho ekirikwingana ki? Akasiima Ruhanga ahabwa Tomasi kukura ari omwaana murungi kandi yaashaba ngu Ruhanga amuhe amaani ahabw'omurimo gugumiire ogw'okuba omushaija mukuru omuka.

Yuda akatuuraho obwiire bukye. Ahanyima y'emyeezi mikye aherize kwiita, abantu omu kyaaro baahurira ngu akaita ondiiho muntu omu kyaaro ekindi nka mailo 10 na bwanyima ondiiho omu kindi kyaaro. Omukazi wa Yuda akaba aremwa kuruga omunju ye, ekishwaaro kikaba kiri kihango. Bumwe na bumwe abaporiisi bakaba baija bamukora kubi, barikumubuuza ahu Yuda ari. Konka bury'omwe akaba nareeba ngu naawe n'enshoberwa. Akaba atsigirweho kandi arikusitaana kubaho. Mazima ekaba etari enshobe ye ngu Yuda akaba ari mubi munonga.

Yuda ku yaabeire arikwiita omuntu wa kataano omu disiturikiti empango, baamukwaata. Kikatwaara ekicweka ky'eizooba bury'omwe kuhuriira ku bamukwatsire. Okuhoza kwateebwaho kandi orugambo rukaba nirugira ngu naaza kutunga ekiheneso ky'okufa. Eki kikagambwaho buri hamwe, omu kyaaro, omu misiri, omu maka. Yuda akaba ariyo naaza kufa. Bury'omwe yaikiriza, mazima akaba akishemereire. Akaba aitsire omuriisa hamwe n'abandi bantu bana. Omumazima akaba ari omuntu mubi. Konka nabwe kikaba kigumiire kuteekateeka ngu omwe aharibo arikuza kucwerwa orubanja rw'okufa.

Ekibiina kimwe kuruga aha kyaaro baasharamu kuza kuhurira omushango ogwabeire gurikuza kubaho omu rurembo. Bamwe bakaba bashabirwe kuba baakareebi b'okwiitwa kw'omuriisa Matayo. Hakabaho akatabanguriko kakye obwo bury'omwe arikugyezaho kutiiza ebijwaaro by'omukoro mukuru kandi baataho

enteebekanisa ahabw'orugyendo ruraingwa. Bakaba nibaahurira okuruhukwa ngu hati oburinganiza bwaaza kukorwa. Yuda mazima akaba ari mubi.

Eizooba ry'omushango rikaba niryotsya munonga. Ekishengye kiky kikaba kijwiire abantu boona barikuyomba. Omuramuzi yaateera aha meeza munonga kugira ngu habehe obuteeka. Okuhunama kwabaho ahonaaho. Yuda yaayemera omukashengye arikureeba omuramuzi. Omuramuzi yaimutsya ebipapura kandi yaashoma emishango emuteirweho. "Ori hanu kuhozesibwa ahabw'okwiita abantu bana" reero yaashoma amaziina. "Nooyehozaho ota?" Yuda tiyaboona eky'okwehozaho. Eizooba ryagumizamu n'abajurizi kuruga omu bantu bana abaitsirwe barikwemerera kandi baakashoborora eki bareebire. Obwiire obwingi okurumbwa kukaba nikubaho kuteine kigyendererwa. Abantu bakaba nibakora ebintu byaabo obu Yuda abaita. Shana omurundi gumwe obu kyareetwa okurwana okwatandikiire barikunywa amaarwa. Ecuupa zikarekyeerwa reero omuntu yaahendera afiire.

Ekibiga omu kishengye kyaaba kyingi kandi n'ebigambo by'okwiita byatuma abantu baatayehurira gye. konka kubagiire kuza ahari kyamushana boona baikirizana ekintu kimwe ngu Yuda ashemereire kufa.

Ahanyima ya kyamushana, ekishengye kijuura. Boona ku baabeire bashutami kandi bahunami omuramuzi yaatahamu. Yaarebeka ahindukireho kandi ayanguhimu. Yateera ahameeza kugira ngu bahuname reero yaatandiika kugamba.

"Yuda, nareeba omushango gwaawe kandi hatariho kubanganisa gukusingire oshemerere n'okufa. Oburinganiza nibuteekwa kukorwa." Ekishengye kyoona kyashaasha. Obu nibwo bwiire obu Yuda yaabeire naaza kucwerwa orw'okufa. "Kwonka, naatunga okushaba kw'omutaano, oku naateekateekaho. Okushaba oku naasharamu kwikiriza." Abandi abakuru omu eiramuriro bareebana, baashobeirwe. Abantu abari omukishengye ku bareebire akavuyo kari ahagati y'abakuru omu eiramuriro, baatandika kugambirana." MUHUNAME." Ekishengye ahonaaho kyahunama, oruyombo orwaabeire niruhurirwa n'orwa za fani zirikubinga ekibiga. Abantu kake baremwe okwitsya.

"Yuda, omufaakazi wa Matayo yaantayayira kandi yaanshaba ngu omu mwanya gwaawe, omutabani, Tomasi naaza kushashura omuhendo. Naagamba na Tomasi hamwe n'omufaakazi wa Matayo obwiire buraingwa kandi naikiriza okushaba kwaabo. Yuda otsingirwe omushango ahabw'okwiita abantu bana, Tomasi, noiya kufa ahabw'okwita abantu abo bana. Yuda hati oine obusingye kwegyendera."

Oruyombo n'akavuyo byabaho ahonaaho. Omukanya kake boona bahunama bwanyima boona bagamba omurundi gumwe. Tomasi akaba ariyo naaza kufa ahabw'okwiita kwa Yuda. Kikaba kigwiire, kitari ky'oburinganiza. Tomasi akaba ari omwojo murungi. Akaba naakora munonga kuhereza nyina kuruga obu ishe afa. Akaba atakakoragaho ekintu kibi. Yuda akaba ari mubi kandi ensi ekaba neyenda ngu arugeho. Bake bareeba Yuda ahu yaabeire ari, ashutami ahansi arikurira.

- Yuda akagarukamu ata ahari eki Tomasi na nyina baakoziire?
- Nooteekateeka ngu Yuda nabaasa kuhinduka ata ahabw'ekyakozeirwe?
- Omugane ogu nigutukwataho guta nk'abaikiriza?

OKUGAMBA EBYARUGAMU

Oku Omwegyesa Aratwaaze: Muhaane ebiteekateeko aha bibuuzo by'okubanza (SG). Reero mushome ebibuuzo bya kabiri, kandi oreke abeegi babiteekateeko bury'omwe wenka. Ohendere orikugyezaho kureeba ngu ekibiina kyayetegyereza enshonga nkuru ezi ahaifo.

Omumazima, omugane ogu tiguri gw'amazima. Twashoma omuheru, nitureeba kitarikukora amakuru. Omumazima tikikabaasika. Konka teera akashushani ngu ekintu nk'eki kyaabaho- omuntu oteine rubanja yaafa

ahabw'ebibi by'ondiiho. Tikikakozire amakuru. Tikikabiire kihikire. Kandi obwo kikabaho. Yesu, otarakozeire ekibi kyoona, akafa ahabw'ebibi byaitu. Akaza aha musharaba yaayemera okufa kubi okw'okubambwa. Akaba atakishemereire. Akaba ateine rubanja. Kandi obwo akafa okushashura omuhendo gw'ebibi byaitu.

Baibuli netugambira ngu boona baakashisha kandi tibarikubaasa kuhika aha kitinisa kya Ruhanga (Abarooma 3:23). Tweena tukaba tushemereire kufa. (Abarooma 6:23) omuri eki titurikumanyisa okufa kusha kureka okuza gehena ebiro byoona. Okubonabona kw'ebiro n'ebiro. Titukayeyihaho ebibi byaitu ahabw'okuba barungi nari okukora ebintu birungi. Hariho omuntu oshemereire kushashurira ebibi. Ruhanga akatukunda munonga yaahayo omwaana we okushashura omuhendo. Yesu akafa omu busaasi ahabw'ebibi byaitu, Hati, ku turaabe nitwikiriza ekiconco ekyo, okushashura ahabw'ebibi byaitu, titurikwetenga kuza gehena kureka kumushanga om eiguru.

OKWESHWIJUMA KW'OMUNTU

- Waaraikirize ekiconco ekyo?
- Noosharamu ota kuturaho omu gundi muringo ahabw'ekyo?
- N'enki ekindi eki orikuteekateeka ngu kyeine kuhinduka omu magara gaawe ahabw'okugarukamu aha kiconco kya Kristo?

Waaraikirize ekiconco ky'okufa kwa Kristo? Hatariho kwikiriza okufa kwa Kristo nitwaija kumara ebiro byoona omuri gehena. Ku turabe twikirize ekiconco ekyo obwo twine kwebuza ekibuuzo eki- Tushemereire kugarukamu tuta? Reeka twijuke Yuda omu kanya kake. Ashemereire kugumizamu nka buriho-arikunywa amara kandi arikiita nko'ku yaabeire naakora? Ingaaha tukaayenzeire ngu Yuda atuureho omu magara gashemereire; areeke okunywa amara kandi atwaaze gye omukazi n'abaana, abagabirire, kandi ayambe ekyanga. Atungire ogundi mugisha gw'okubaho omu magara; ashemereire kugukozesa gye nk'ekikorwa ky'okusiiima ahari Tomasi owaashashwire omuhendo mwingi. Tukaagwerirwe akagwe Yuda ku yaakugumizamu naaturaho nk'oku yaabeire ari kare.

Kandi shi itwe? Nituturaho tuta? Nituturaho nk'abantu abarikwetegereza ngu Yesu akafa aha musharaba kutuhereza omugisha gwa kabiri? Nituturaho turikumanya ngu tukakundwa oburengye? Nituturaho okuhereza ekitinisa ekitambo ekyo? Nituturaho turikusiima? Ruhanga atugambiire omu kigambo kye oku agyendereire ngu tutuureho. Okuba orikworoba tikirikutujuna. Konka tushemereire kworoba ahabw'okuba nitumanya omuhendo muhango ogwashashwirwe ahabwaitu. Ahabw'okuba nitwenda kworeka Ruhanga oku turikusiima ahabw'ekitambo kye.

Konka Ruhanga akoreka rukundo ye ahariitwe omuri eki: ku twabeire tukiri abasiisi, Kristo yaatufeera (Abarooma 5:8).

Nitujunwa tuta?

OKUHAANA EBITEEKATEKO OMU KIBIINA KIHANGO

Shoma Abaefeso 2:8-10.

- Nitujunwa tuta? (Orunyiriri 8)
- Nituteekwa kukora ki ahabw'ekirikuruga omu kujunwa omu muringo ugu? (Orunyiriri 10)
- Nooteekateeka ngu ekigambo eki nikimanyisa ki'ngu hatagira owayehimbisa'? (Orunyiriri 9)

Titurikubaasa kumarayo okujunwa kwaitu ahabw'okukora emirimo mirungi. Nitwegamira embabazi za Ruhanga. Embabazi ze n'ekiconco kandi titukakikorera. Obu kiri ekiconco, titukayehimbisa ahabw'ebitukoziire. Tihariho n'omwe orikubaasa kuhika aha kigero kya Ruhanga. Nituteekwa kwegamira Ruhanga okutujuna.

Oku Omwegyesa Aratwaaze: *Handiika aha rubaho ebigambo ebi ahaifo*

TITURI KUJUNWA AHABW'OKWEHINDURA, NITUHINDUKA AHABW'OKUBA TUJUNIRWE.

Hariho mbaganisa ki aha bigambo ebi bibiri?

- *Ruhanga akatujuna. Eki tikiirikuruga omu maani gaitu*
- *Twaheza kweteygereza ekiconco kya Ruhanga ahariitwe, obwo nituturaho omu miringo gw'omutaano okumushemeza.*

Teekateeka aha bwiire obu waakwatwaho ahabw'embabazi z'omuntu yaakugiriire.

- Okakora ki ahanyima y'ekyo? Akakwaate kaawe n'omuntu ogwo kakahidukaho kata?
- Okajemeserezibwa kumushashura nari okahurira nooyenda ahabw'ekikorwa kye kye'embabazi?
- Eki nikimanyisa ki ahakurugirira oku turikugarukamu ahari Kristo ahabw'ekiconco kye ky'okujunwa?
 - *Nituteekwa kukora ebintu birungi kuruga aha mutima gwaitu, hatari ahabw'obujunanizibwa. Eki kiine kubaho twaayeteygereza omuhendo gw'musharaba. Twiine kuhinduka, kutari kugira ngu tugyemeserezibwe kukora batsyo kureka ahabw'okuba nitwenda ngu tushemeze Ruhanga kandi tworeke okusiima kwaitu ahariwe.*

OKUHAANA EBITEEKATEEKO OMU KIBIINA KIKYE

Omu bubiina bukye, muhaane ebiteekateeko aha kibuzo eki reero muhandiike eby'okugarukamu

- Ni mu miringo ki ei amagara gaitu gashemereire kuhinduka ahabw'ekiconco kya Kristo?

MUGAMBE EBYARUGAMU omu kibiina ekihango

OKUTA OMUNKORA OKW'OMUNTU

Kuruga omu by'okugarukamu, toorana ekintu kimwe eki orikwenda ngu orebe kihindikire omu magara gaawe okworeka rukundo yaawe ahari Ruhanga. Okabaasa ota kuguma noyeyijutsya burizooba ahabw'okukora empinduka egyo omu magara gaawe?

OMUBUGUFU

Reeba aha magara gaawe. Ahabw'okuba ori omukristaayo, amagara gaawe gaine omutaano? Gashemereire kuba ag'omutaano kuruga ahari abo abatakaikiririze omuri Ruhanga? Ahabw'enki?

Omu mashomo agarikukurataho, nituza kureeba eki Ruhanga arikutweenza. Ni twetenga kwijuka ngu nitwenda kubugabugana ebi arikutweenza tihabw'okugira ngu tukorere okujunwa, kureka ahabw'okuba nitusiima ahabw'okuba yaaherize kutujuna.

Eishomo 2: Nitushabwa Okukora Ki?

Enshonga Enkuru

1. Ebiragiro byoona hamwe n'ebya baanabi biteirwe omubugufu birikugira biti "Kunda mutaahi waawe". Eki nitwetenga kukyita omunkora omu magara gaitu.

Ebikozeso

1. Ebishushani by'okureeberaho: Ekipande ky'Okworeka Rukundo – kopi emwe ahabwa buri kabiina kakye
2. Akatabo k'omweegi (SG)Ti eiteeka
 - a. Ekipande ky'okworeka rukundo

Okwanjura

OKUHAANA EBITEEKATEEKO OMU KIBIINA KIKYE

- Ruhanga naatwenza ki omu magara gaitu? Omwikiriza Musya ku yaakukubuuza ekibuuzo eki, okamugarukamu ota?

Omu mashomo agarikukurataho, nitwaija kweega eby'okugarukamu bitarikushushana aha kibuuze eki – “nitubaasa kutuuraho tuta nk'oku Ruhanga agyendereire.?” Twaaba nitugyezaho kutuuraho omu magara g'omutaano, nitwetenga kwijuka enshonga ahabw'enki. Titurikugyezaho kutuuraho batsyo kugira ngu tujunwe. Kureka, twaaherize kujunwa obu twayaakira Yesu Kristo nk'omujuni waitu. Nitwenda okutuuraho kw'omutaano kurugirira ahari ebyaatwegyeise kugira ngu tworeke rukundo n'okusiima ahariwe.

Kunda Bataahi Baitu

OKUHAANA EBITEEKATEEKO OMU KIBIINA KIHANGO

Shoma Luka 10:25-37.

- Nihabaho ki omu mugane?
- Okurugirira aha mugane ugu, mutaahi waawe nooha?
- Omugane ugu nigutworeka muringo ki ogw'okukunda mutaahi waitu?
- Ni kibuuze ki eki Yesu yaabeire naagarukamu? (Orunyiriri 25)

Shoma Mako 10:17-21.

- Ekibuuzo ky'omutsigazi omutungi nikiiha?
- Eky'okugarukamu kya Yesu nikiiha?

Ogundi murundi nitureeba ngu ekicweka kimwe ky'okugarukamu ahabw'okuhinduka Omukristaayo nookugira ngu nituteekwa kuhwera enshoberwa. Nikibaasa kwetenga okweshasha konka Yesu yaatworeka kurungi ngu eki n'ekicweka kikuru ky'okukuratira Ruhanga.

Shoma 1 Abakorinso 13:1-3.

- Enyiriri ezi nizatwegyesa ki?
- Nitwetenga kukora ki? (KUKUNDA!)

Hanu entumwa Paulo akoreka ngu nitubaasa kukora ebintu byingi birungi, konka twaaba tutari kubikora omuri RUKUNDO byoona tibyeine mugasho.

Okuta Baibuli Omubugufu

OKUHAANA EBITEEKATEEKO OMU KIBIINA KIHANGO

Omu kutendeka omu kitabo kyaitu ky'okubanza tukeega oku orikuta Baibuli yoona omubugufu. Shoma Matayo 22:36-40.

- Ebiragiro ebirikukirayo obukuru nibiiha?
- Kuri ekiragiro kimwe kyakozeseibwe okuta Baibuli omubugufu, noteekateeka ngu kikaabeire kiiha?

Shoma Abagalatia 5:14.

- Ni ebiragiro biiha ebi Paulo arikugamba ngu nibita omubugufu ebiragiro byoona hamwe na banaabi?
- Noteekateeka ngu ahabw'enki Paulo naatorana ekiragiro eki omu mwanya gw'ekindi (kunda Ruhanga)?

Ku turaabe tujunirwe ahabw'embabazi, ahabw'enki hariho okuhamisiriza aha bintu ebi turikukorera mutaahi waitu? Nikireebeka nk'ekitahikire. Obutoosha nitwegyesibwa ngu titurikujunwa ahabw'emirimo ei turikukora, kureka ahabw'eki Yesu yaakoziire kyonka. Mbweni ahabw'enki obutoosha turikureeba ngu Baibuli nehamisiriza omugasho gw'okukunda abandi?

Shoma 1 Yohaana 5:3a na Yakobo 1:27.

- Enyiriri ezi nizituhwera zita okwetegyerereza ahabw'enki kiri kikuru okukunda abandi?
 - *Okukunda abandi nigw'omuringo guturikworekamu okusiima kwaitu ahari Ruhanga. Nink'ekigyezo ky'okureeba yaaba omuntu ari omwikiriza omu mazima. Amagara g'omwikiriza w'amazima nigaba gahindukire. Yohaana na Yakobo baakworeka omuringo gw'okukimanya obwo orikureeba oku turikworobera ebiragiro bya Ruhanga hamwe n'oku turikutwaaza abandi.*

Abantu nibabaasa kumanya ku turi abakristaayo/abaikiriza kurugirira aha muringo ogu turikukunda abandi.

Eshonga z'okutakunda abandi

OKUHAANA EBITEEKATEEKO OMU KIBIINA KIHANGO

Shuba orebe ahari Luka 10:25-37.

Omuhandu ogurikuruga Yeriko gugumire kandi n'ogw'akabi. Gukaba nigweetwa "omuhanda gw'eshagama." Yerusalemu eri nka mitazi 750 kuza ahaiguru kandi Yeriko ni mitazi 260 kuza ahansi. Eki nikimanyisa ngu hariho enkingo ndaingwa kurenga mitazi 1000, konka hariho oburaingwa bwa kilomita 25 ahagati y'endembo ibiri.

Abantu babiri baakehuza owaabeire agwire omu bambuzi. Nitubacwera orubanja, konka oyerinde, ahabw'okuba niturahuka kukora enshobe niyo emwe. Omuhanda gurikuza Yeriko gukaba guri mubi munonga-kuri baayemereire kuhwera omuntu ogwo, obundi nabo baakabeire nibakwaatwa abashuma. Baine eshonga y'okutuma baatahwera. Kandi naitwe turi nkabo. Nituhereza eshonga nyingi z'okutuma tutaahwera, nk'okutiina munonga.

- Ni shonga ki zimwe ezi turikukira kuhereza okutahwera abooro nari abakyene?

OKUHAANA EBITEEKATEEKO OMU BUBIINA BUKYE (SG)

Omu bubiina bukye, mwijuze ekipande **ky'okworeka Rukundo (EKISHUSHANI KY'OKUREEBERAHO)**.

Teekateeka aha bantu abahandikiirweho ahaifo. Ahari bury'omwe, gyezaho kuteekateeka aha muntu orikushushana n'ebirikushoboorora, reero ohandiike ekintu kimwe eki orikubaasa kukora okworeka Rukundo aha muntu ogwe. Ku oraheze, otoorane hakiri abantu 2 kuruga aharukarara reero oyeheyo kugira eki waakora omu wiiki egi kuboreka rukundo.

<u>Bataahi Baitu</u>	<u>Oku wakubaasa kworeka Rukundo.</u>
Omuniyamahanga nari omuntu musya omu kyanga kyaawe	
Omuntu owu oine nawe akatabanguriko	
Omuntu ori hare na Ruhanga, eky'okureeberaho, omusinzi, omureesi w'enjaga, memba w'ekibiina kibi n'ebindi.	
Omuntu owaabeire naija omu kanisa konka atakyaia.	
Omwikiriza Musya	
Omuniywani	
Ondiijo memba w'ekanisa	

Oku Omwegyesa Aratwaaze: *Hendera n'obubiina bukye barikushabirana kugira ngu bahikirize okwehayo kwaabo kw'okworeka rukundo omu wiiki egi.*

Eishomo 3: Nitubaasa Okuhwera Tuta?

Enshonga Enkuru

1. Yeega okuhwera abandi omu muringo gw'okugira ngu tibaragume baakwegamiire.

Ebikozezo

1. Akatabo k'omweegi katari eiteeka (SG): Omukyara Lee

Okuhwera Abandi

OKUHAANA EBITEEKATEEKO OMU KIBIINA KIHANGO

Shoma Matayo 25:31-46.

- Ni mbaganisa ki eri ahagati y'entaama n'embuzi?
- Ni bintu ki mukaaga ebi entaama zaakoziire?

Ruhanga naatushaba okureeberera abakyene. Omu eishomo eri, nitwaija kweega baingi aha muringo murungi gw'okubahwera.

Shoma Ruusi 2:1-16

- Boaz akakorera ki Ruusi?
- Noteekateeka ngu n'ahabw'enki Boaz yaahwereire Ruusi omu muringo ogu hatari kumuhereza eby'okurya kusha?
 - *Boaz akaikiriza Ruusi kurundana engano ahabweye kugira ngu atunge ekitinisa ky'okukora emirimo hamwe n'okubaasa kuhwera nyinazaara.*

Hariho embaganisa nkuru ahagati y'ebicweka ebi bibiri (Matayo 25:31-46 hamwe na Ruusi 2:1-16).

Eky'okubanza n'eky'okureeberaho ky'okuhereza "ebintu by'obwiire bugufu". Ekyakabiri n'eky'okureeberaho ky'okuhereza 'okuhwera kw'obwiire buraingwa". Ni kikuru kwetegyereza embaganisa eri ahagati ya "ebintu by'obwiire bugufu" hamwe "n'okuhwera kw'obwiire buraingwa" hamwe n'embeera ei buri kimwe kirikubaasa kukora gye.

- **Ebintu by'obwiire bugufu** nibikora gye omu bwiire bw'ebizibu ry'ahonaaho. Eby'okureeberaho birimu nka enju y'omuntu yaatsya, omuntu yaarwara ahonaaho nari habaho ebizibu nka omwegyemure eihunga, nari okutwarwa kw'etaka. Matayo 25:31-46 negaamba munonga aha kuhwera kw'obwiire bugufu nk'okuhereza eby'okurya, amaizi, oburaro, ebijwaaro n'ebindi.
- **Okuhwera kw'obwiire buraingwa** nikukora gye obu ebizibu birikumara obwiire buraingwa, ekirikumanyisa ngu tibibaasize kuhinduka nari kuhwaho kumara obwiire buraingwa. Eby'okureeberaho ni nka obu eka erikumara omwaka gwoona etiine eby'okurya birikumara nari erikuza omu mabanja, nari obu abantu barikuguma nibarwaara endwaara emwe. Okuhwera kw'obwiire buraingwa nikwetengwa ahu ebizibu bimwe birikuguma nibibaho buri mwaka. Ruusi 2:1-16 n'eky'okureeberaho ky'okuhwera kw'obwiire buraingwa. Boaz taaraherize eby'okurya by'ahonaaho kureka akahereza Ruusi omurimo kugira ngu abaase kwetungira eby'okurya.

OKUHAANA EBITEEKATEEKO OMU KIBIINA KIKYE (SG)

Omuringo murungi gw'okuhwera abakyene tikuri kubahereza eby'okurya obutoosha. Reeka tushome eky'okureeberaho ekindi ky'okuhwera kw'obwiire buraingwa. Omukyara Lee n'omukazi buzima. Aine ekyetengo

ky'okuhwera amaka g'abooro omu kyanga kye, okukira munonga abo abateine emirimo. Yaatandika kutayayira amaka gamwe buri kweezi arikuronda emiringo y'okubahwera kutunga emibereho. Hanu hariho emigane eshatu ahari maingi oku yabaasize kuhwera amaka. Emigane egi yoono n'amazima.

Omugane 1 – Omukyara Lee hamwe n'omusiri gw'ebimuri

Omu mwanya gwe, hakaba harimu eka y'abooro eine abaana babiri. Boona maama na taata bakaba bateine omirimo. Omukyara Lee yaaza kubatayayira kandi yaareeba hariho omwanya mukye gweitaka omu maisho g'eka yaabo. "Ahabw'enki mutarikuhinga ebimuri" yaababuuza." Nimubaasa kutuma eka yaanyu yareebeka gye kandi mubiguze omu katere akabari haihi."

Maama omuka egyo yaakora ekyo, kandi yaatandiika kutwaara ebimuri ebi ahingire omu katere kubiguza. Ahonaaho yaajumbura ngu abaguzi bakaba nibabuuza omuringo ogundi gw'ebimuri konka akaba aine eitaka rikye atarikubaasa kuhinga ebimuri ebindi. Kwonka maama ogu yaatandiika kugura ebimuri kuruga ah'abandi bahingi arikubiguza, aha rubaju gw'ebyeye ahabw'okutunga amagoba. Hati ahabw'okugira ngu akaba aine omwanya mukye omu katere gw'okugurizaho ebimuri bye, yaateekateeka ati," nimbaasa kuguza n'ebindi bintu" naimuka kare buri kasheeshe kugura eminekye na coconati by'okuguza omu katere aha mudaara gw'ebimuri.



Omugane 2 –Omukyara Lee hamwe n'omusiri gw'ebitakuri

Eka endiijo eyaabeire neyetenga obuhwezi ekaba neyenda kukora, konka etarikumanya eky'okukora kandi etaine bukugu bwoona. Bakaba nibakora emirimo ya rijarija, konka kaingi bakaba batarikubaasa kubona emirimo. Omukyara Lee akaba nareeba ngu eka egi n'abakozi munonga kandi mazima nibenda ngu bakore, n'ahabw'ekyo yaaza kutayayira endiijo eka omu kaniisa eyaabeire nehinga ebitakuri. Yaababuuza yaaba okuhinga ebitakuri kurimu amagoba, yaaba hariho akatare karungi, hamwe n'ebi orikwetenga kutandiika kuhinga ebitakuri. Ku yaamanyire ngu n'omurimo murungi, yaashoboororera eka ngu Ruhanga atwetsire ngu tukunde bataahi baitu kandi tureeberere abooro. Yaababuuza yaaba nibakunda kwegyesa eka y'abooro kuba abahingi b'ebitakuri. Baikiriza. Omukyara Lee yaabuganisa eka ezi ibiri. Eka y'abooro yaashemererwa ngu hati nabo baaza kugira eki baakora kandi ahonaaho baagyenda baapangisa eitaka rikye hamwe na kyona ekyabeire nikyetengwa kutandiika. Ahamuheru gw'omwaka, bakatunga omusharuro murungi kandi babaasa kushashura ez'okupangisa eitaka, esente z'embibo, kandi baagira amagoba marungi ahabw'eka.



Omugane 3 – Omukyara Lee hamwe n'okugarukana kw'eka

Eka ya kashatu ei omukyara Lee yaabeire naayenda kuhwera ekaba etaanire n'abazeire baabo. Abazeire bakaba nibaikiriza ngu eka egi teine mugasho kandi teeriba kintu. Omukyara Lee yaabugana n'eka kugyezaho kubagarukanisa. Omukyara Lee yaabahamiza ngu naija kuguma naabugana n'eka obutoosha kandi abahwere kuboneza amagara gaabo yaaba abazeire nibikiriza kubakiira kandi



bakabahweraho kakye. Ekyarugiremu, abazeire baasharamu kugaruka kwesiga mutabani waabo kandi baamuguza esente kugira ngu atandiike kushubura ebyoma bya sikurapu. Hati naagura ebikuziire ebikozirwe omu byoma kandi abiguza aha duuka erikubigarura busya. Hati naabaasa kushagika eka ye kandi naahurira aine ekitinisa.

OKUHAANA EBITEEKATEEKO OMU KIBIINA KIKYE (EBISHUSHANI BY'OKUREEBERAHO)

- Omukyara Lee akakoraki ahabwa buri eka?
 - *Akahereza obuhabuzi hamwe n'okugaruramu amaani*
 - *Akatayayira abandi, nk'eka eyaabeire nehinga ebitakuri, okweega yaaba kyabeire nikigoba kandi yaaba baabeire nikakunda kuhwera.*
- N'enki ekyazarukire omu bikorwa by'Omukyara Lee?
 - *Abantu bakatunga emirimo kandi babaasa kugabirira amaka gaabo.*
 - *Abantu bakagira omwetunguuro ahabw'okuba bakaba nibabaasa kugira eki bakora okwehwera.*
- Haakabeireho ki kuri Omukyara Lee yaaherizeyo esente nari eby'okurya ahari buri bantu?
 - *Bakaba batarikuza kuhinduka.*
- Kuri omukyara Lee yaabaheire esente buri wiiki kumara emyaka ebiri reero akareka, noteekateeka ngu amagara gakahindikire munonga nk'oku gaabeire?
 - *Ingaaha, bakaba nibaza kumanyira omukyara Lee arikubahereza esente kandi baba nikyo bayegamira omu mwanya gw'okukora.*
- Ni mbaganisa ki eri ahagati y'okuhwera n'esente hamwe n'omuringo ugu omukyara Lee yaahwereiremu?
 - *Akahereza abantu okumanya omuringo gw'okukora kugira ngu beehwere.*
- Teera akashushani ngu baingi omuriitwe twatandiika kukora nka omukyara Lee—okutayayira amaka n'okuhurikiza, okureeba n'okugyezaho kwetegyereza ebizibu byaabo, reero n'okuronda eby'okugarukamu. Hakabeireho empinduka eta omu kyanga kyaawe?

OKUGAMBA EBYARUGAMU

OKUHAANA EBITEEKATEEKO OMU KIBIINA KIHANGO

Ebikorwa by'omukyara Lee n'ebby'okureeberaho by'okuhwera kw'obwiire buraingwa. Taaraheire amaka eby'okurya, akakora kumaraho ekizibu ky'obwiire buraingwa. Ni kikuru kwijuka ngu ebintu by'obwiire bugufu nibikora gye omu bizibu by'obwiire bugufu, kandi okuhwera kw'obwiire buraingwa nikukora gye aha bizibu by'obwiire buraingwa.

- Teekateeka aha bikorwa bya Rukundo ebi ekanisa yaanyu erikukira kukora. Nibikira kuba ebintu by'obwiire bugufu nari okuhwera kw'obwiire buraingwa?

Omu puroguramu ya TCT tujumbwire ngu ebyanga nibihinduka munonga ekanisa yaatandiika kubugabugana munonga ebizibu by'obwiire buraingwa. Okwombeka enguuto, okuhunduuza amashomero, okwongyera omutindo eby'obuhingi, hamwe n'okwegyesa kumanya eby'amagara kandi n'okureebera esente n'emiringo y'okubugabugana ebizibu by'obwiire buraingwa.

OKUHAANA EBITEEKATEEKO OMU KIBIINA KIKYE

Handiika orukarara gw'ebintu 6 ebi entaama zaakozeire omuri Matayo 25:31-46. Hereza kimwe ahari buri kabiina kake. Obashabe kukora orukarara rw'emiringo y'okuhwera ei baakukoziire kuri ebizibu ebi biri eby'obwiire buraingwa omu kyanga kyaabo. Eky'okureeberaho, omu mwanya gw'okuhereza eby'okurya omurundi gumwe, okabaasa kuhwera ota amaka agarikuba gateine by'okurya birikumara omu kyanga kyaawe? Nari, omu mwanya gw'okuhereza omubazi obwiire bwoona, okabaasa ota kuhwera abantu abarikukira

kurwaara omu kyanga kyaawe, okukira munonga endwaasra ezirikubaasa kwerindwa nka enjoka hamwe n'ekirukano? Ohige ebibiina okujumbura emiringo y'obwiire buraingwa mikye okubugabugana buri mbera.

OKUGAMBA EBYARUGAMU

Eishomo 4: Obukama Bwa Ruhanga

Enshonga Enkuru

1. Nitwetenga kutuura omu kworobera Ruhanga omu bicweka by'amagara gaitu goona.

Ebikozeso

1. Ebishushani by'okureeberaho:
 - a. Omuzaano gw'ekishaakuzo (seti emwe buri kibiina- ehandikirweho embaju zoonza hariho enamba z'ekipande orubaju rumwe kandi orundi hariyo orunyiriri rwa Baibuli. Reero obushare omu bicweka bya sikweya kandi ohereze seti emwe ahari buri kibiina.
 - b. Engyendererwaho z'omuzaano ogu(kopi emwe ahabwa buri kibiina)
 - c. Ekipande ky'entwaaza yaitu hamwe na Baibuli(kopi emwe ahabwa buri kibiina)
2. Bwa kaada bukye buriho busha
3. Akatabo k'omweegi(ti eiteeka) (SG)
 - a. Ekipande ky'entwaaza yaitu hamwe na Baibuli.

Obukama bwa Ruhanga

OKUHAANA EBITEEKATEEKO OMU KIBIINA KIHANGO

Shoma Luka 4:43.

- Ahabw'enki Yesu yaayoheerezibwe?
- Obukama bwa Ruhanga n'enki?

Shoma eshaara eri omuri Matayo 6:9-13.

Omu shaara egi, nitushaba ngu "Obukama bwe bwaije, ebi okunda bikorwe omunsi nk'oku bikorwa omu eiguru". Okaashoborora ota amakuru g'eki aha muntu otari mwikiriza?

Oku Omwegyesa Aratwaaze: Hurikiza eby'okugarukamu kuruga omu kibiina. Ahanyima y'okuhurikiza, gyezaho kureeba ngu okushoborora kwateekwa kubamu okworobera okukunda kwa Ruhanga. Omu shaara egi, nitugamba ngu nitukunda kworobera okukunda kwa Ruhanga omu bicweka by'amagara gaitu goona omunsi nk'oku kiriba omu eiguru.

Ruhanga naayenda ngu tureebe obukama bwe omunsi nk'oku buri omu eiguru. Yesu hamwe n'entumwa Paulo nibagamba munonga aha bukama bwa Ruhanga konka baky'e omuriitwe nitwetegyereza eki obukama bwa Ruhanga buri. Omu mazima, ekigambo ky'obukama bwa Ruhanga tikigumire kwetegyereza. Obukama bwa Ruhanga n'omwanya gwoona ahu Yesu ari omugabe kandi n'ebiragiro bye birikukuratirwa. N'ahabw'ekyo, obukama bwa Ruhanga nibureebwa omu mwanya gwoona ahu turikureeba abantu barikutuuraho omu kworobera okukunda kwa Ruhanga. Omu buriho, obukama bwa Ruhanga tiburyaija omu bwijwiire okuhitsya obu Yesu arigaruka kandi buri kintu kyoona kikagaruka busya obwo hatakiriho ekibi kyoona.

Okuba abaikiriza nikimanyisa ngu nitwetenga kugyendera omu kworobera Ruhanga omu bicweka by'amagara gaitu goona.

Ekitabo Kyaitu Ky'engyendererwaho

OMURIMO OMU BIBIINA BIKYE

Oku Omwegyesa Aratwaaze: Hereza buri kibiina seti emwe y'obucweka bushazirwemu ahabw'omuzaano gw'ekishakuuzo (**EBISHUSHANI BY'OKUREEBERAHO: Omuzaano gw'ekishakuuzo**). Otakabahereza engyendererwaho hati. Obahereze edakiika **3 zonka** okuta hamwe obucweka bw'omuzaano hatariho **kurengaho**. Nikaija kuba kigumire okumara ekishakuuzo eki omu bwiire obu konka obemereze ahanyima y'edakiika 3.

Bwanyima obahereze engyendererwaho z'omuzaano gw'ekishakuuzo (**EBISHUSHANI BY'OKUREEBERAHO: Engyendererwaho**). Obahereze edakiika 3 ezindi kuhendera.

1. Ohindure buri kicweka ky'orupapura okworeka enamba. Ote enamba kurugirira aha kipande eki ahaifo.
2. Hati oshube ohindure ebicweka ebi ogundi murundi --- nikaija kureebeka kiti.

Abantu bangye abarikwetererwa eiziina ryangye ku baryecureeza, baashaba kandi bansherura kandi baareka emihanda yaabo emibi, obwo ndyahurira kuruga omu eiguru kandi ndyabasasira ebibi byaabo kandi nkize ensi yaabo.

OKUHAANA EBITEEKATEEKO OMU KIBIINA KIHANGO

- Omuhanda ogwaaba gwanguhi niguuha? Ogweine engyendererwaho nari zitariho?
- Ahabw'enki kyayanguha omurundi rwakabiri?
- Naitwe tuheirwe engyendererwaho oku tushemereire kutuuraho. Ni kitabo ki kyengyendererwaho ekitweine ekirikutworeka oku tushemereire kutuuraho?
 - Baibuli

Ruhanga naatuhanga kandi naatumanya gye. Naamanya ekirungi ekitushemereire kandi naatukunda. Naatwendeza ekirikukirayo oburungi. Kugira ngu atuhwere tube abasinguzi omu magara, naatuhereza ekitabo kirimu engyendererwaho z'amagara. Nitwetenga kworobera ebihandikiirwemu. Eki tikirikumanyisa ngu tituribugana ekizibu kyoona. Baibuli negamba ngu bury'omwe naija kubugana ebizibu. Eki nikimanyisa ngu n'obu twaakubugana ebizibu, Ruhanga naatuhwera okubisingura.

Okukura nk'oku Ruhanga Agyendereire

OKUHAANA EBITEEKATEEKO OMU KIBIINA KIKYE (SG)

Omu kitabo 1, tukagamba aha myanya 4 eitwiine kukuramu. Emyanya egi 4 neeha?

- Obwengye (ebiteekateeko) omu mwoyo, omu mubiri, omu kakwaate n'abandi

Okuhwera kukuza emyanya egi ena, nitwetenga kwetegyereza eki Baibuli-ekitabo kyaitu ky'engyendererwaho-kirikugamba omu mwanya gw'entwaaza yaitu eki erikugamba.

Omu bubiina bukye, mwijuze ekipande ky'entwaaza yaitu hamwe na Baibuli (**EBISHUSHANI BY'OKUREEBERAHO**).

Ahabwa buri nshonga, teekateeka aha kirikukira kukorwa omu kanisa nari omu ntwaaza yaanyu. Reero oshome enyiriri za Baibuli kandi ohandiike enshonga enkuru. Reebe yaaba ekanisa yaawe nari emicwe y'entwaaza nibishushana n'eki Baibuli erikugamba.

Oku Omwegyesa Aratwaaze: waaba oine obwiire bukye, shaba buri kibiina kukora aha mitwe etarikushushana aha kipande reero babagane ebyarugamu omu kibiina ekihango.

	ENTWAAZA YAITU	BAIBULI
Ebiteekyerezo		
Obwengye		Enfumu 3:13-15
Akakwaate n'abandi		
Obushwere		Abaefeso 5:33
Amaka		Abaefeso 6:1-4; Enfumu 22:6
Okukunda abandi		1 Yohaana 3:16-17
Okukunda Abazigu		Matayo 5:43
	ENTWAAZA YAITU	BAIBULI
Omu mwoyo/ akakwaate na Ruhanga		
Oku waakuba haihi na Ruhanga		Matayo 22:35-38
Okubuurira		Matayo 28:18-20
Omu mubiri		
Okureeberera amagara		1 Abakorinso 6:19-20
Okutwaaza gye esente		1 Timoseo 6:10; Enfumu 21:20; 1 Timoseo 5:8; Abaefeso 4:24
Okukora		Abakolosai 3:23
Okurinda eby'obuhangwa		2 Abatesalonika 3:10-12

OKUHAANA EBITEEKATEEKO OMU KIBIINA KIHANGO

Shoma Matayo 6:33

- Nikimanyisa ki okubanza kusherura obukama bwa Ruhanga?

Nk'oku twegyeire, obukama bwa Ruhanga nibureebwa hoona ahu turikureeba abantu barikutuura omu kworobera okukunda kwa Ruhanga kandi barikumuhereza ekitinisa nka Mukama w'amagara gaabo. Ekyo nikimanyisa ngu "okusherura" obukama nikimanyisa ngu nitusherura okworobera Ruhanga munonga. Tikirikumanyisa ngu tushabe kusha. Nitwetenga kugyezaho kworobera Ruhanga omu myanya y'amagara goona.

OKWESHUJUMA KW'OMUNTU

Hati toorana emitwe 1-2 kuruga omu ntwaza yaitu hamwe na Baibuli ei orikwenda kwongyeraho omu magara gaawe kandi okaba omwesigwa kukiraho aha ngyendererwaho ya Baibuli. Handiika orunyiriri rwa Baibuli aharupapura reero oruhanikye omu nju yaawe kugira ngu ogume norureebaho buri wiiki.

Oku Omwegyesa Aratwaaze: Ahanyima ya buri muntu kuheza kuhandiika oruyiriri rwa Baibuli aharupapura, oshabire ekibiina ngu babaase kukura omu kworobera engyendererwaho za Ruhanga ahabw'amagara gaabo.

Eishomo 5: Amatsiko Ga Nyensya

Enshonga Enkuru

1. Ensi ekashishikara obu abantu baashiisha, konkka Yesu akaija kugarukanisa ebintu byoona.
2. Tihariho ekihikire omunsi egi, konkka ahabw'okugyendera omu kworobera Ruhanga nitubaasa kutandiika kureeba enpinduka.

Ebikozeso



1. Ebishushani by'okureeberahos: Ebipande by'Obukwaate (ebishushani 4, ebikozesibwe omu Kitabo 1)
2. Akatabo k'omweegi(ti eiteeka) (SG): Oku waakuba Orikwombeka Obukama



Engiri Omu Bwijwiire

OKUHAANA EBITEEKATEEKO OMU KIBIINA KIHANGO

Omu eishomo ry'okubanza omu kitabo 1, tukabuuza ekibuuzo – “ahabw'enki Yesu yaafire aha musharaba? Hariho orikwijuka eky'okugarukamu ky'ekibuuzo eki?

Oku Omwegyesa Aratwaaze: Omubugufu hurikiza eby'okugarukamu byaabo reero oboorekye kandi ogarukemu buri kishushani ebi 4 (**EBISHUSHANI BY'OKUREEBERAHO: Ebipande by'obukwaate**). Shoboorora buri kipande:

<p>Picture 1: Creation</p> 	<p>Okuhangwa – Obu Ruhanga yaahanga ensi, ebintu byoona bikaba biri birungi.</p>
<p>Picture 2: The Fall</p> 	<p>Okugwa – ahanyima ya Adamu na Hawa kushiisha, ekibi kikakwaata aha myanya y'amagara yona.</p> <ul style="list-style-type: none"> • Omuntu hamwe n'omuntu: Adamu na Hawa baatandiika kuhajaana n'okwegyekyererana orubanja. • Omuntu na Ruhanga: Ruhanga akaba atakigyendagyenda omu kibanja n'omuntu nk'enyimaho. • Omuntu n'Ebihangirwe: Okukora kukaguma, okuzaara kwaba okw'obusaasi.

<p>Picture 3: Restoration</p> 	<p>Omusharaba/okugarurwa busya – Yesu akaija kugarukanisa ebintu byoona (Abakolosai 1:20).</p>
<p>Picture 4: The Return</p> 	<p>Okugaruka – Ensi neija kugaruka ebe nungi ahanyima y’okugaruka kwa Kristo (Okushururirwa 22).</p>

Obwahati turi ahagati y’ekishushanis 3 na 4. Buri kintu kyoona tikikabeire kirungi. Ni bumanyiso ki bumwe oburikworeka ngu ensi tekabeire nungi?

Okugarukanisa Ebintu Byoona

OKUHAANA EBITEEKATEEKO OMU KIBIINA KIHANGO

Okufa kwa Yesu kukatandiika okugarukanisa kw’ebintu byoona kandi Ruhanga akatukwaatsa omurimo gw’okugumizamu omurimo ugu yaatandikiire.

Shoma 2 Abakorinso 5:17-20.

- Ni buhereza ki obu Ruhanga yaatuheire ngu tukore?
 - *Obuhereza bw’okugarukanisa*

Shoma Abakolosai 1:20.

- Yesu akaija kugarukanisa ki?
 - *Ebintu byoona*

Yesu Kristo akatandiika omurimo kurabira omu kufa kwe n’okuzooka, kandi naitwe tuhairwe omurimo gw’okugumizamu eki yaatandikiire. Nitwetenga kuba abajwekyerwa be b’okureeta okugarukanisa.

- Nitubaasa tuta kuba abarikureeta okugarukanisa?

Oku Omwegyesa Aratwaaze: Shoma emigane egi ahaifo kandi muhaane ebiteekateeko aha bibuuzo ahanyima ya buri mugane.

Omugane 1 – Okugwejegyera Kurungi kwa Nyekiro

Omu kyanga kimwe, abakazi baingi bakaba nibaimuka shaha mushanju z’akasheeshe kutandiika kukora emirimo yaabo ya burizooba. Batakatungire kyansya, bakaba baashenya enku, bataha amaizi, kandi bateebekanisa eby’okurya by’amaka gaabo. Ahanyima ya kyansya, bakaba baza kukora omu misiri kumara eshaaha nyingi kandi bakora n’obundi bujunanizibwa bw’omuka. Buri mwebazyo, abakazi bakaba bagaruka omu maka gaabo baruhiire ahabw’emirimo y’eizooba, batakyeine maani g’okuhumuraho n’okumara obwiire baarikushemererwa n’amaka gaabo.

Ahanyima y’okutendeka kwa TCT ahaby’obushwere hamwe n’amaka, abebembezi bakye b’ekanisa baasharamu kutandiika kworeka rukundo abakazi baabo barikubahereza. N’obu omu kubanza kyabeire nikibashwaaza, abashaija bakenda kworobera Ruhanga omu myanya y’amagara gaabo yoona, harimu n’okuhereza abakazi baabo. Ahanyima y’okukigambaho munonga, baasharamu kwimuka hateine owayimukire okwehara okushwaara ahabw’abandi kumanya ngu bariyo nibahwera abakazi baabo. Abashaija baimuka n’abakazi baabo shaaha ikumi z’akasheeshe kuhwera omu kuteebekanisiza eizooba, kirikuhereza abakazi baabo eshaaha ezindi eishatu z’okubyaama. Ekyazarukiremu kikaba nikitangaaza! Abakazi ahabw’okuhurira baaruhikirwe kandi barikuheebwa ekitinisa abashaija baabo, bakabaasa kwongyera obwiire n’amaani omu maka gaabo. Bwanyima eki, kyareetaho amaka gashemereirwe kandi garimu obusingye. Abantu omuka baatandiika kutunga obwiire hamwe kandi amaka gaagira amaani n’amagara marungi.

Ahonaaho ekyanga kyareeba ngu hariho ekhindukire omu maka aga, reero baatandiika kucondooza. Tikirabatwarire obwiire buraingwa kujumbura ngu abashaija baabeire nibaimuka shaaha ikumi, kirikuhereza abakazi eshaaha ezindi z’okugwejegyera. Omu mwanya gw’okushekerera abashaija, nabo baatandiika kuhinduka! Hati eizooba ku ririkuturuka ahari shaaha ikumi z’akasheeshe, nikwo n’amaka g’omu kyanga eki garikukora, obwo bakwatsirweho abashaija bakye omu kanisa abagizire ekyetengo ky’okuhereza abakazi baabo. Hati amaka omu kyanga gashemereirwe kandi gaine amagara marungi. Nikitangaaza oku okweyongyeraho kugwejegyera eki kirikubaasa kukora!

- Hakabaho ki omu mugane ugu?
- Ekyatandikiire byoona n’enki?
- Hakazarukamu ki?
- Ekyanga eki kirikweyongyera nari kuyendera omu kuba nk’oku Ruhanga agyendereire?
- Nitubaasa kweega ki omu mugane ugu?

Omugane 2 – Kuruga omu Kuhiganisibwa kuza omu Kwebembera.

Hakaba hariho omuriisa omwe omu eihanga rimwe owaabeire naakira kweetwa aha kitebe kya polisi. Hakiri nk’emirundi mukaaga omu nwaka, abapolisi bakaba baija omu kutendeka oku yaabeire naakora reero bamutwaara aha kitebe kya polisi. Eizooba rimwe akeega aha kiteekateeko ky’okwombeka obukama bwa Ruhanga reero yaatandiika kwegyesa ekanisa ye ebiteekateeko ebi. Yaagaruramu amaani ekanisa ye hamwe n’abu yaabeire aineho obujunanizibwa kutandiika kuhereza bataahi baabo n’okutandiika kuronda emigisha y’okukoramu ekyanga kyaabo kuba nk’oku Ruhanga agyendereire ngu kibe.

Ekanisa yaatandiikaho emirimo maingi: okuhereza abakyene, okwombeka amaju ahabw’efaakazi, okuhunduuza enguuto, okwombeka za kamina, n’ebindi. Ekanisa yaatandiika kukanya kandi n’abaikiriza baayeyongyera kukura. Ebibi by’omu bantu nka okunywa amara hamwe n’okuteera zaara byaarekyera aho omu kyanga eki. Mpura mpura abebembezi ba gavumenti bareeba empinduka ei omuriisa hamwe n’amakanisa agu yaabeire

nareeberera garikuretaho omu kyanga. Ekyarugiremu baakakora omuriisa omwebembezi w'ekyanga ekyo. Akatandiika omurimo gwe omusya arikwegyesa abantu be amashomo g'ebya'amagara kandi babaasa kwegyesa bury'omwe omu kyanga amashomo aga. Hati amagara g'abarikutuura omu kyanga ekyo gariyo nigezongyera kuba gye.

- Omuriisa ogu akakora ki''
- Ni miringo ki ei arimu naayombekamu obukama bwa Ruhanga?
- N'enki ekizarukiremu?
- Ni mashomo ki kuruga omu mugane ogu aguturikubaasa kuta omu magara gaitu?

Omugane 3 – Abaana Abarikuza Aheishomero.

Omu mwanya gumwe, omubare gw'abaana abaabeire nibaza aheishomero gukaba guri ahansi munonga. Omushaija omwe, ahabw'okumanya omugasho gw'obwegyese, yaasharamu kugyezaho n'okugira eki yaakikoraho. Yaagambira abandi omu kanisa aha kizibu eki kandi yaarundana abantu bakye abaabeire nibakunda kukora nawe omu kumaraho ekizibu eki. Baatandiika kuza ahari buri nju baarikugaruramu amaani amaka kwohereza abaana baabo aheishomero. Ekyarugiremu, abaana boona omu kyaaro kye baaguma omu eishomero. Abakuru omu by'obwegyese omu myanya endiijo bareeba ekyabeire nikibaho omu kyanga eki kandi baamutabarusa kuza omu myanya endiijo kugaruramu abazeire amaani g'okugumya abaana baabo omu eishomero. Hati, ti abaana b'omukyaro kye bonka kureka n'omu byaaro ebibehinguririze nabo nibaguma omu eishomero.

- Ni muringo ki ogu omushaija ogu ariyo naayombekamu obukama bwa Ruhanga?
- Nikibaasika kita okukora ekintu nk'eki omu kyanga kyaitu?

Tweena nitubaasa kuba omuntu orikureetaho empinduka omu byanga byaitu, abantu aba bakaba batari b'omutaano nari bahiirwe omugisha kukiraho. Bakaba bari abantu ba buriiho nkaiwe naanye. Bamwe bakaba baine obwegyese bukye konka bakaba nibakunada kukora eki barikubaasa okwombweka obukama bwa Ruhanga omu byanga byaabo.

Oku Waakuba Orikwombeka Obukama

OKUHAANA EBITEEKATEEKO OMU KIBIINA KIHANGO (SG)

Ruhanga naabasa kukora ekintu kyoona eki arikwenda. Akabaasize kwombeka obukama bwe atatwiine. Konka egyo tiyo enteekateeka ye; enteekateeka ye n'okutukozesa omu kwombeka obukama bwe. Okwombeka obukama bwa Ruhanga nikitandiika naitwe.

Oku Omwegyesa Aratwaaze: *Oshome kuraba omu ku waakubaasa kwombeka obukama. Shaba abeegi kushaba barikuteekateeka oku bakubaasa kuba abarikwombeka obukama.*

1. Oyetandikiireho

Entambwe y'okubanza omu kureeba obukama bwa Ruhanga burikwombekwa omu magara gaawe, omuka yaawe, omu kanisa yaawe, omu kyanga kyaawe hamwe n'omunsi yoona n'okubanza waayereeba. Nookunda okukozesibwa Ruhanga? Nookunda kworobera Ruhanga omu magara gaawe goona? Ni kintu ki kimwe nari bibiri ebi orikubaasa kwongyera kuboneza omu wiiki egi?

2. Yegyesa kandi ogaruremu amaani eka yaawe

Waatandiika kuta omunkora obukama bwa Ruhanga omu bicweka by'amagara gaawe, nooyetenga kutandiika kugaruramu amaani eka yaawe kukora nikyo kimwe. Nk'oku turikushoma, tushemereire kuba nitwegyesa amaka gaitu obwiire bwoona (Eky'ebiragiro 6:7) tikyanshonga ebi turikukora. Ronda emiringo y'okwegyesa eka

yaawe ahabw'eb'y'orikukora, kurabira omu kugamba nabo kandi n'okuronda emiringo y'okubahwera kutandiika kuhereza abandi.

Oijukye ebintu ebi waayehireyo kukora omu eishomo omuri buri myanya yooni ena n'okuhwera eka yaawe kukura

3. Shaba Ruhanga akukozese okukwaata ah'abandi.

Tandiika kushaba n'okubuuza Ruhanga kukuhweera kukwaata ah'abandi. Sherura emigisha. Waaba noreeba abantu bari omu bukyene, shaba Ruhanga akworeke oku waakubaasa kuhwera abantu aba.

Ruhanga naakunda n'okukiraho kutuhweera omu kwombeka obukama bwe. Naija kutushururira omu bwiire buhikire, omuringo guhikire gw'okuhwera

4. Hereza abandi

Oyenyigiire omu kikorwa kya rukundo kandi oronde endiijo miringo y'okuhereza. N'obu waakuba noohurira ngu torikubaasa kukora kihango, nabwo oshemereire kukozeza etalanta zoona ezi Ruhanga akuheire okuhereza. Waaba noohereza, noiya kutandiika kukura kandi oshange nobaasa kukura baingi.

Eishomo 6: Kozesa Byoona Ebi Ruhanga

Akuheire

Enshonga Enkuru

1. Ruhanga atuhereize baingi munonga, kandi naatuteekateekaho kubikozesa byoona ahabw'obukama bwe.
2. Nitwetenga kukozeza etalanta zaitu, obutungi hamwe n'esente ahabw'ebigyendererwa bye. Twaakora tutyo, Ruhanga nabaasa kubibazamu okuhikiriza ekintu ekirikukiraho obuhango.

Ebikozeso:

1. Ebishushani by'okureeberahos:
 - a. 6.1 Omuzaano gw'enfumu y'etalanta (kopi 5)
 - b. 6.2 Omuzaano gwa Daudi na Goliasi (kopi 5)
2. Orupapura gw'ekipande

Emigane Eshatu ya Baibuli

Oku Omwegyesa Aratwaaze: Eishomo ritakatandiikire, shaba ba nyekundeire 10 kuteebekanisa hamwe n'okuzaana emizaano egi ebiri (**Ebishushani by'okureeberahos**). Egi n'emizaano ebiri hamwe na banyekundeire abu orikwajja kwetenga ahabwa buri muzaano:

- 6.1 Enfumu y'etalanta (Matayo 25:14-30) – ba nyekundeire 5
- 6.2 Daudi na Goliasi (1 Samueli 17:12-54) - ba nyekundeire 5



Omuzaano 1 – Enfumu y'Etalanta (Matayo 25:14-30)

Enfumu y'etalanta obutoosha neetukanga. Omu Baibuli yoona nitureeba omutima gwa Ruhanga ahabw'abooro hamwe n'okwarikwanga obutari buringaniza hamwe n'okuhata. Konka omu mugane ugu, buri muntu akaheebwa etalanta zitarikwingana, reero ogwo owaaherwe nkye yaafubirwa kandi yaaferwa byoona ebi yaabeire aine! Nitwetenga kureeba aha nfumu egi n'obwegyendesereza okugyetegereza gye.

Oku Omwegyesa Aratwaaze: shaba ba nyekundeire 5 kukora kuzaana enfumu y'etalanta. Bwanyima obuuze ebibuuzo by'okuhaana ebiteekateeko kandi ogyezeho kureeba ngu baayetegereza enshonga ibiri z'ahamuhuru ahaifo.

Omuzaano gw'enfumu y'Etalanta

(Kurugirira ahari Matayo 25:14-30)

Ba nyekundeire 5 - Omukama, Omwambari 1, Omwambari 2, Omwambari 3, Orikugambirira omugane

Omukama: Abambari, mwije hanu muhurikize. Ndi heihi kugyenda omunsi endiijo. Hanu hariho etalanta eitaano ezindikuhereza kureeberera (*ahereze etalanta eitaano ahari Omwambari 1*).
...Etalanta ibiri ahabwaawe (*ahereze etalanta ibiri ahari Omwambari 2*).
...Etalanta emwe ahabwaawe (*ahereze etalanta emwe ahari Omwambari 3*).
Mugumeho gye.

Omwambari 1: Wawo, esente ka ninyingi. Nintekwa kuzikozesa n'obwengye (*agiyenda*).

Omwambari 2: Ezi sente nkaazikozeise n’obwengye! Omukama aine amatsiko maingi (*agyenda*).

Omwambari 3: Hati nyowe, haakabaho ki ku naakunaga egi talanta- amagara gangye gaakahwaho! Rindaho, naamanya, ninyiija kutimba omu eitaka ngisherekeyo (*agyenda*).

Orikugambirira omugane: Ahanyima y’obwiire buraingwa, mukama w’abambari yaagaruka kandi yaatuma aha bambari be kwaija bakahereza imbarira

Omwambari 1: Mukama wangye, okampereza etalanta eitaano: reeba nkoziire ezindi eitaano (*aherezayo etalanta 10*).

Omukama: Kazaare, omwambari omurungi kandi omwesigwa! Obaire omwesigwa omuri bikye; ndyakuha obushoboerozi kutegyeke baingi. Taaha omu kushemererwa kwa mukama waawe.

Omwambari 2: Mukama wangye, okampereza etalanta ibiri: reeba nkoziire ezindi ibiri. (*Aherezayo etalanta 4*).

Omukama: Kazaarel omwambari omurungi kandi orikwesigwa: obaire omwesigwa omuri bikye, ndyakuha obushoboerozi kutegyeke baingi. Taaha omu kushemererwa kwa mukama waawe.

Omwambari 3: Mukama wangye, nkamanya ku ori omuntu ogumire, ogyesha ahu otarabibire kandi ohunika ebi otaraheherize, n’ahabw’ekyo nkatiina, naagyenda, naashereka etalanta yaawe omu itaka. Reeba ngigi ogigarukane. (*Aherezayo etalanta 1*).

Omukama: Iwe omwambari omubi kandi omweremwa! Okamanya ku ngyesha ahu ntarabibire kandi nkahunika ebi ntaheherize? Obwo okaba oshemereire kuha etalanta yangye ababiiki b’empiiha, naanye ku naakwizire nkaagigaruriirwe n’enshaagi yaayo. Omuserukare! Mugimwaakye mugihe oine etalanta ikumi. Ahakuba oine niwe ariheebwa akagira bingi. Konka otaine aryayakwa n’eki aine. N’omwambari ogwo otaine mugasho, mumunagye aheeru omu mwirima. Okwo niyo abantu bariririra kandi bakanena enshaya.

Ebibuuzo by’okuhaanaho Ebiteekateeko:

- Ahabw’enki omukama arikusiima ow’etalanta eitaano hamwe n’ibiri?
- Ahabw’enki omukama arikutonganisa omuntu oine etalanta emwe?
- Ekyabaireho ahamuheru n’enki aha muntu ow’etalanta emwe?
- Nitubaasa kweega ki kuruga omu nfumu egi?
 - Ruhanga naayenda ngu tukozese ebi atuhaira yaaba biri bingi nari bikye.
 - Twaakozesa ebi Ruhanga atuhaira, naija kubibazamu.

Omuzaano 2 – Daudi and Goliath (1 Samuel 17:12-54)

Oku Omwegyesa Aratwaaze: Shaba ba nyekundeire 5 okuzaana omuzaano gwa Daudi na Goliath baarikukozesa **EBISHUSHANI BY’OKUREEBERAHO:** Omuzaano gwa Daudi na Goliath. Bwanyima obuuzze ebibuuzo by’okuhaanaho ebiteekateeko ahaifo.

Omuzaano gwa Daudi na Goliath

(kurugirira ahari 1 Samueli 17:1-54)

Banyekundeire 5 – Daudi, Mweneishe, Omuserukare, Saulo, Goliath

Daudi: Naabaramusya beine taata! Naabareetera eby’okurya ebi taata abateebekanisize. Orugamba ruri ruta?

Mweneishe: Hariyo ekikaaka kirikweetwa Goliasi. Burizooba naija atuhiga konka tihariho orikubaasa kumurwanisa. Ni muhango! Omugabe akagira ngu naija kuhereza ekihembo ky’amaani omuntu oraamwite.

Daudi: Nooha ogwe ou engabo za Ruhanga ohuriire zirikutiina? Nitwetenga kumurwanisa ahakuba Ruhanga waitu naija kutuhwera!

Mweneishe: (*N’ekiniga*) niiwe oha kugamba ebigambo nk’ebi? Ori omwoojo muto orikuriisa entaama, reero noteekateeka ngu oine omugasho?

Omuserukare: Daudi, toora orubaju oru. Tukahurira ebi waagambire ahari Goliasi kandi n’omugabe Saulo naayenda kukureeba.

Daudi: Omugabe naayenda kundeeba? Nyowe ndi omwoojo kusha.

(*Ashohora kubugana Saulo*)

Daudi: (*Arikugaamba na Saulo*) Nyabura otahwa amaani ahabw’omufilistia ugu. Ninza kugyenda murwanise.

Saul: Torikubaasa kumurwanisa. Ori muto kandi we n’omushaija omanyirire engamba kuruga omu buto bwe.

Daudi: “Nyowe omwiru waawe nkaba ndiisa entaama za taata. Ku haabeire haija entare nari edubu, ekiiha entaama omu busyo, nkaba ngikurata, ngiteera ngigwiiha omu kanwa. Kandi ku yaabaire enkurata, ngikwata akareju, ngiteera ngiita. Omwiru waawe akaita entare n’edubu n’Omufilistia ogwo otashazirwe naija kuba nk’emwe aharizo ahabw’okuba ahigire amahe ga Ruhanga ohuriire. Mukama owaanyihire omu byara by’entare n’ omu byara by’edubu naija nkujuna n’omu mikono y’ogwo Mufilistia”.

Saul: Irooko, Mukama agume naiwe. Reebe ebijwara byangye by’okurwanisa, obijwaare.

Daudi: (*Ayeshushaniriza kujwara ebijwara kandi atambura kubi*). Ekijwara eki nikihango, tinkabaasa kukijwara ahakuba tinkimanyirire. (*ayeshushaniriza kukijuura kandi akwaata amabaare ataano makyekuruga ahansi. Ashohora, kurwana na Goliasi.*)

Mweneishe: Ekirikuba hanu n’enki? Reebe, omwoojo nakora ki? N’omushema mazima. Eka yaitu neiya kushwara ahabweye!

Goliasi: (*Areeba Daudi*) Ndi embwa waaza kumpururira n’enkoni? Ija nkubaagire amahungu g’omu mwanya n’enyamaishwa z’omu ihamba.

Daudi: Wampururira na rurara n’eicumu na akacumu, kwonka nyowe naija omu iziina rya Mukama ow’amahe Ruhanga w’engabo za Israeli ezi ohigire. Eri izooba Mukama naakuhayo omu mikono yangye ninkuteera, noogwa ninkucwaho omutwe. Kandi erizooba ninyija kugaburira amahungu g’omu mwanya n’enyamaishwa z’omu ihamba emitumbi y’engabo z’Abafilistia haza ensi yoona neemanya ku habaho Ruhanga omuri Israeli kandi n’omutwe gwona oguri aha nigumanya ku Ruhanga atajunisa rurara na icumu. Ahakuba orugamba oru n’orwa Mukama kandi naija kubahayo omu mikono yaitu”.

Goliasi: (*ayirira haihi Daudi kandi ayeteekateeka kurumba.*)

Daudi: (*ayeshushaniriza nk’orikurekyera katuuri ahari Goliasi*)

Goliasi: (*ayeshushaniriza nk’owateerwa kandi agwa ahansi afa*)

Daudi: (*ayiruka juba asharaho omutwe gwa Goliasi.*)

Saulo, Mweneishe n’Omuserukare: (*Bashemereirwe*) Ruhanga yaatuha obusingye!

Ebibuuzo by’okuhaanaho ebiteekateeko:

- Daudi akaba ari omutungu, aine etalanta nari arikumanywa?
 - *Ingaaha, Daudi akaba ari omwoojo kusha. Akaba aine obukugu bukye obu yaayegyeyire kuruga omu kuriisa entaama, kwonka akaba naayegamira okuhwera kwa Ruhanga.*
- Daudi akakora ki kusingura Goliasi?
 - *Akakozeza etalanta ezi yaabaire aine. Obubaasa bweye bukaba bwanguuhi ahakuba akaba akiri muto, kwonka akaba naakunda kubukozesa ahabw’ekigyendererwa kya Ruhanga.*
- Ekyazarukiremu n’enki?
 - *Ruhanga akahimbisibwa kandi na ihanga ryaagira obusingye.*

Omugane – Omufaakazi hamwe na Nabi Eliya (1 Abagabe 17)

Shoma I Abagabe 17:8-16.

- Omufaakazi akaba aine ki?
- Nabi Eliya akamushaba ki?
- N’enki ekyazarukiremu?
- Nooteekateeka n’ahabw’enki Ruhanga yaayohereze nabi Eliya aha mufaakazi? Hakaba hariho aba Israeli balingi abaabeire baatwiire okwo, kandi ti boona abaakubeire bari abooro nk’omufaakazi ogu.
- Ahabw’enki Ruhanga yaahaire omufaakazi omugisha atakaheireyo?

Ruhanga Naabazamu

OKUHAANA EBITEEKATEEKO OMU KIBIINA KIKYE

Omuri buri muzaano nitureebamu eishomo rikuru. Buri omwe akakozeza eki yaabeire aine nk’oku Ruhanga yaabahiire. Daudi akaba ataine esente, konka yaakozeza obukugu obu yaabeire aine. Omufaakazi nawe akaba ataine esente, konka akakozeza ekihuuro kye ky’ahamuhuru. Obu baabeire nibakunda kukozesa ebi baabeire baine, nibwo Ruhanga yaabibarizemu kandi akakora omu miringo erikutangaza.

Ruhanga atuhairi ki? Kyanguhi kwikiriza ekishuba ngu tiheine eki twiine, kwonka eki tiky’amazima.

Oku Omwegyesa Aratwaaze: Ahaifo hariho ebikozeso by’emiringo ena ebi Ruhanga atuhairi kukozesa. Hereza ekikozeso kimwe ahari buri kibiina. Bashabe kukora orukarara aharupapura rw’ekipande eby’okureeberaho 10-20 by’ekikozeso ekyo. Reero buri kibiina kibagane n’ekibiina ekihango.

Eby’okureeberaho bikye nibihebwa. Kozesa eby’okureeberaho kureeba ngu buri kibiina kyayetegyereza omuringo gw’ekikozeso, reero obareke baijane eby’okureeberaho 10-20 ahabwaabo.

- Ebikozeso by’Omwoyo – *Okushaba, Rukundo ya Ruhanga, obwengye bwa Ruhanga*
- Obubaasa – *obubaasa bw’okuteeka, obubaasa bw’okuhinga n’okuriisa, obubaasa bw’okwombeka enju.*
- Okumanya – *okumanya eby’amagara, okumanya obukugu bw’okukuza abaana*
- Ebikozeso by’omubiri – *enju, ebijwaaro, emibiri eine amaani, eby’okurya.*

OKUHAANA EBITEEKATEEKO OMU KIBIINA KIHANGO

Reeba aha bipande by’ebikozeso kandi muhaane ebiteekateeko:

- Ni bikozeso ki ebi twiine ebi turikwetenga kukozesa munonga ahabwa Ruhanga?
- Nk’ekanisa, nitubaasa kukozesa tuta ebintu ebi okuhereza Ruhanga?
- Ni kintu ki kimwe eki orikubaasa kukora omu kweezi oku okwongyera kukozesa gye ekikozeso eki oine ahabwa Ruhanga?

Eishomo 7: Okore Okureetera Ruhanga Ekitinisa

Enshonga Enkuru

1. Nituhaisa Ruhanga ekitinisa twaaba nitukora n'amaani.
2. Twesiirwe kuba ababiiki b'ebihangirwe bya Ruhanga.

Ebikozeso

Orupapura rw'Ekipande

Ahabw'enki Twiine Okukora?

OKUHAANA EBITEEKATEEKO OMU KIBIINA KIKYE

- Ni enshonga ki zimwe ez'okukora? Kozesa enyiriri ezi ahaifo hamwe n'ebindi biteekateeko ebi waatungire omu eishomo eri.
 - 1 Abatesalonika 4:11-12
 - 1 Timoseo 5:8
 - Abaefeso 4:28
 - 1 Abakorinso 10:31

OKUGAMBA EBYARUGAMU

OKUHAANA EBITEEKATEEKO OMU KIBIINA KIHANGO

- Nooteekateeka ngu Ruhanga agyendereire ngu itwe tukore?
- Ni nteekateeka ki ei abantu baine aha kukora?
- Obu Ruhanga yaabaire nahiinga omusiri (Kut 2:8), nari Yesu ari omubaiji (Mak 6:3), nooteekateeka ngu enteekateeka ye aha kukora ekaba eri eha?
- Nitubaasa kweyongyera tuta kugira enteekateeka nk'eya Ruhanga?
- Nitubaasa kuhwera tuta abandi kugira enteekateeka nk'eya Ruhanga aha mirimo yaabo?

Ruhanga Naata Omutima Aha Kuturi kukora Omurimo Gwaitu

OKUHAANA EBITEEKATEEKO OMU KIBIINA KIHANGO

Obutoosha nikigambwa ngu abakozi b'abaikiriza nibo babi okukirayo.

- Nooteekateeka ngu ahabw'enki nikibaasa kuba kiri eky'amazima?
- Eki nikibaho omu kyanga kyaanyu?
- Nooteekateeka ngu Ruhanga naahurira ata aha baikiriza kugira eiziina nk'eri?

N'obu Baibuli etarikworeka ngu emirimo emwe n'ey'omugasho munonga nari mukye, Baibuli eine bingi eby'erikugamba aha ku tushemereire kuba nitukora emirimo yaitu. N'ekicweka kikuru omu bwiire bwaitu-

ahakuba nitukiira kumara obwiire bwingi turikukora, n’ahabw’ekyo tushemereire kwegyendesereza oku turikukora emirimo yaitu.

OKUHAANA EBITEEKATEEKO OMU KIBIINA KIKYE

Mureebe aha nyiriri ezi omu bubiina bukye. Enyiriri ezi nizatwegyesa ki aha kukora? Funza enyiriri zoona ina omu kintu kimwe.

- 2 Abatesalonika 3:10-12
- Enfumu 10:4
- Enfumu 19:15
- Enfumu 21:25

OKUGAMBA EBYARUGAMU

OKUHAANA EBITEEKATEEKO OMU KIBIINA KIHANGO

Nooteekateeka ngu enyiriri ezi nizatwegyesa ki aha kutushemereire kukora?

- 1 Abakorinso 10:31 – *Hereza Ruhanga ekitinisa*
- Abakolosai 3:23- *Kora nk’orikukorera Ruhanga.*

Omu magara maingi ga Yesu akaba ari omubaiji. Teera akashushani orikumureeba nk’omubaiji.

- Nooteekateeka ngu oburungi bw’omurimo gwe bukaba buri buta?
- Teera akashushani ngu okakora hamwe nawe omu eibijiro; kikaabaire kiri kita okukora nawe?
- Akakoziire ata omu eizooba?
- Akakoziire ata hatariho n’omwe orikumureeba?

Okuhiinga Okureetera Ruhanga Ekitinisa

OKUHAANA EBITEEKATEEKO OMU KIBIINA KIHANGO

Baingi omuriitwe twiine obukugu bw’okukora nk’abahiingi. Shoma Okutandiika 1:28-29 na 2:15. Ezi nizo engyendererwaho z’okubanza ezi Ruhanga yaahaire omuntu.

- Ruhanga naagamba ki eki turikuteekwa kukora omu nyiriri ezi?

Oku Omwegyesa Aratwaaze: *Okuruga omu nyiriri ezi ibiri za Baibuli, gyezaho kureeba ngu ekibiina kyareeba engyendererwaho ishatu nkuru – nituteekwa okukora, tukareeberera, kandi tukategyeka ebihangirwe.*

Nangwa n’obu omuntu yaabeire atakashiishire, Ruhanga naatuteekateekyera okureeberera ebihangirwe. Kwonka, ahabw’okugwa omurimo gwaitu gukaguma. Konka n’obu okukora kugumire munonga hati, nabwe kikiyaari eki Ruhanga yaatushabire kukora.

OKUHAANA EBITEEKATEEKO OMU KIBIINA KIKYE

Omu nyiriri ezi twaahaza kushoma, Ruhanga akatuhereza engyendererwaho ishatu: okukora, okureeberera, kandi n’okutegyeka ebihangirwe.

- Okukora = Eki nikimanyisa ngu nitwetenga kukuza ebihangirwe kugira ngu bibaase kuzaara bingi, ku turikukozesa emiringo mirungi y’okuhiinga nituba nitukora ebihangirwe.

- Okureeberera = Eki nikimanyasa ngu nitwetenga kurinda ebihangirwe hatari kubishiisha. Ku turikukozesa orweezo n'omubazi gw'obukoko byingi, nitubaasa kushiisha ebihangirwe. Okuzibira okwiruka kw'amaizi hamwe n'omwooya mubi naayo n'emiringo y'okurinda ebihangirwe.
- Okutegyeka = Eki nikimanyisa ngu twine obushoboorozi aha bihangirwe. Obukooko nari nk'embeba byareeta ebizibu, nitwetenga kubizibira (nka ab'abahindi ba Pokomchi eki baakoziire abu twayeegireho omu eishomo 2 ry'ekitabo3). Okutegyeka ebihangirwe nabwo nikimanyisa ngu nitubaasa kuronda emiringo y'okwerinda ebihikirizi, nari tubizibire kubaho.

Omu bubiina bukye:

1. Hereza omutwe gumwe buri kibiina- okukora, okureeberera hamwe n'okurinda ebihangirwe. Bashabe okukora orukarara aha kipande orw'emiringo ei bakubaasa kukoramu eki omu kyanga kyaabo. Na bwanyima buri kibiina kibagane omu kibiina ekihango'
2. Ebibiina byoona ku biraheze kubagana, oshabe ekibiina ekihango kureeba n'okutoorana ebintu ebyakubaasa kukorwa nk'ebikorwa bya Rukundo ahabw'ekanisa. Obiteeho akamanyiso aharubaju.

OKWESHWIJUMA KW'OMUNTU

Oku Omwegyesa Aratwaaze: Shoma ebibuuzo ebi reero ohunameho nk'edakiika 1 ahanyima ya buri kibuuze okuhereza abeegi obwiire bw'okweshwijuma bahunami.

- Oriyo nokora, noreeberera kandi nootegyeka ebihangirwe nk'oku Ruhanga yaakigyendereire?
- Nootekateeka ngu Ruhanga naashemererwa omuringo gw'orikukoramu?
- Ni bintu ki bimwe eby'orikubaasa kuhinduraho egi wiiki?

Eishomo 8: Amazima Ahari Sitaane

Enshonga Enkuru

1. Nitwetenga kumanya emiringo ei Sitaane arikugyezaho kutubeiha

Ebikozeso

1. Ebishushani by'okureeberahos: Ekipande ky'ebishuba bya Sitaane (ekicweka kimwe kirimu ebipande 8 kuruga omu kitabo 3).

Sitaane n'omubeihi

OKUHAANA EBITEEKATEEKO OMU KIBIINA KIHANGO

Shoma Yohaana 8:44.



Sitaane n'omubei. Naatubeiha kugira ngu obutoosha atugumye omu bwooro.






- Nibiha biimwe aha bishuba bya Sitaane? Nobaasa kwijukaho bimwe ebi twaaragambireho?

Oku Omwegyesa Aratwaaze: Garukamu omu bishuba 8 orikukozesa ebipande. (**EBISHUSHANI BY'OKUREEBERAHOS**) hamwe n'ekipande eki ahaifo. Ahabwa buri kishuba, shaba ekibiina kureebaho ebintu bibiri:


- 1) N'enki ebirikuzaruka omu kishuba eki?
- 2) Amazima nigaaha?
 - (Kozesa enteebekanisa ahaifo kugyezaho kureeba ngu hariho amazima aharubaju gwa buri kishuba)

Omu muringo ogundi, nobaasa kushaba ba nyekundeire 8 okukwaata ekipande ahabwa buri kishuba, shoma ekishuba n'eiraka rihango, reero obuuzo ekibiina biri bibuuzo bibiri.

<u>EBISHUBA BYA SITAANE</u>	<u>AMAZIMA GA RUHANGA</u>
 <p>Okukora n'omukyeeno kandi omugamba guremereire. Nikirungi kukora kake nk'oku kirikubaasika.</p>	<p>Tuhangiirwe okukora. Adamu akaba naakora okugwa kutakabeireho. N'ekicweka kimwe aha kitinisa kyaitu kandi omuringo gw'okuhimbisa Ruhanga.</p>
 <p>Tukazaarwa turi abooro kandi nitwajja kufa turi abooro.</p>	<p>Ruhanga naija kutuha omugisha ku turaabe nitumworobera.</p>

<p>Turi abooro munonga titurikwetenga kuhayo, abandi bantu bashemereire kutuha.</p> 	<p>Nangwa n'abooro munonga tibeine rusa gw'okutahayo. Omuri Malachi Ruhanga naagambira abantu ngu tibahiirwe Mugisha ahabw'okuba tibarikuta Ruhanga omu mwanya gw'okubanza. Naabagambira kumugyeza haza bakareeba ekirabehe ku baratandiike kuhayo nk'oku aragiire. Nitwetenga kuhayo turikumanya ngu Ruhanga niwe atuhairere byoona kandi naakunda kutugabirira byoona ebi turikwetenga.</p>
<p>Ruhanga naata omutima aba bintu by'omwoyo kusha.</p> 	<p>Ruhanga naafayo aha bicweka byoona eby'amagara gaitu. Ebintu byoona bikashiishikara omu kugwa kandi naayenda kugarukanisa buri kicweka ky'amagara gaitu ahabwe.</p>
<p>Ruhanga naayenda ngu tuburiire bataahi baitu kusha-titurikwetenga kuta omutima aha byetengo byaabo eby'omubiri.</p> 	<p>Ruhanga atugambiire kukunda bataahi baitu. Ku arikushoboorora entaama n'embuzi, naatwijusya ngu Rukundo n'okugabirira eby'okurya, amaizi hamwe n'oburaaro. Ku baamuburize ngu mutaahi waitu nooha, Yesu yaabagambira omugane gw'omusamaria arikubugana omuhinguzi bamuhutiize aha muhanda kandi arikumuhereza obujanjaabi.</p>
<p>Titurikubaasa kuhindura amagara gaitu tuteine esente kuruga aha ndiijo muntu.</p> 	<p>Ruhanga yaaherize kutuhereza omugisha. Nitwetenga kwigura amaisho gaitu tukareeba byoona ebi Ruhanga atuhairere reero tukatandiika kubikozesa. Twaaba nitukozesa ebi Ruhanga atuhairere turikuheisa abandi omugisha obwo nawe naija kutuhereza omugisha. Omu kicweka 1 tukagamba aha Mukyara Lee owaahwereire abantu arikubareetera ebiteekateeko kusha.</p>
<p>Abantu bamwe nibakira abandi. Itwe tituri b'omugasho.</p> 	<p>Tweena tuhangirwe omu kishushani kya Ruhanga kandi Ruhanga naakunda buri omwe munonga kugira ngu akohereza omwaana we okutufeera. Tihariho abantu b'ahaiguru n'ab'ahansi omu bukama bwe. Akaahanga buri omwe nk'oku arikwenda kandi ainire buri omwe ekigyendererwa ky'omutaano.</p>

Obutumwa bw'engiri nibukwaata ah'amagara g'omwoyo kusha.



Yesu akafa okugarukanisa ebicweka by'amagara byoona, bitari eby'omwoyo kusha.

Amazima ga Ruhanga Nigaija Kutuhindura Ab'obusingye

OKUHAANA EBITEEKATEEKO OMU KIBIINA KIHANGO

Shoma Yohaana 8:32

- N'enki ekirituhindura ab'obusingye?

Hurikiza emigane egi reero oteekateeke oku Ruhanga yaahwereire abantu aba kuhindura amagara gaabo.

Omugane 1

Ahanyima y'ihunga ry'amaani omuri 2009, orutindo, ogwaabaire ruri ogw'omugasho munonga omu mwanya ugu, rukatwaarwa amaizi. Oru rukaba ruri orutindo rukuru ahakuba rukaba niruyamba abantu b'omu byanga embaju zoonza okutambura barikushubura ebintu byaabo. Orutindo ku gwaatwirwe amaizi, eby'entambura omu mwanya ugu byayemerera kandi ekyanga kyaguma kiri kyonka. Omu kutandiika, akakiiko k'obuhereza omu bwijwiire k'ekanisa y'aha mwanya baakateekateeka ngu n'abooro munonga kwombeka orutindo. Kwonka, ahabw'okuba ekizibu eki kikaba nikikwaata aha myanya maingi y'amagara= entwaaza, entasya hamwe n'obukwaate-bakaija hamwe kushaba kandi baayeta hamwe ekanisa yoonza okuhaana ebiteekateeko by'okumaraho ekizibu eki. Boona baikiriza kwenyigiira omu murimo ahonaaho. Omwe yaatema emiti y'okutinda orutindo, ondiiro yaashara embaaho kandi abandi baingi baahereza esente z'okugura ebikozeso by'okwombeka nka cementi, amabaare, n'omusheenye. Bury'omwe weena omu kanisa akaba ekicweka kimwe aha murimo ugu. Ahanyima y'ebiro bishatu, baaheza orutindo gw'akanya. Abaana baatandiika kugaruka aheishomero kandi n'ebyoobushubuzi byabaasa kugumizamu.

Ahanyima y'emyeezi etaano, orutindo rw'akanya rwatandiika kucweka kandi abantu tibabaasa kurabaho. Omu kubugana ekizibu eki, akakiiko k'ekanisa kagumizamu nikashaba kandi kaarundaana ekanisa yoonza kukwatanisa hamwe kumaraho ekizibu eki. Omu kubanza, barikubugana ekyetengo eki kihango, ekanisa ekateekateeka ngu tiheine eky'erikubaasa kukora. Bateekateeka ngu okumaraho ekizibu kihango eki kirengiire obubaasa bwaabo. Mbweni, ahanyima y'okushaba, akakiiko kasharamu kwanjura ekizibu eki ahari mukuru w'ekyaro kugira ngu agaruremu amaani abaturagye kushagika n'okukwatanisa n'ekanisa okumaraho ekizibu.

Mukama Ruhanga waitu Asiiimwe! Orutindo rwaashuba rwaayombekwa, abantu babaasa kurabaho kurungi. Ekyanga kyoona kyashemererwa kugira ngu babaasa kumara ekintu eki baabaire nibateekateeka ngu tikirikubaasika. Omu kwombeka orutindo, okushagika kwingi kukaruga omu kanisa. Gavumenti yaaherezayo ebyoma by'okuhamba orutindo. Hati orutindo nirubaasa kukozebiswa kumara obwiire buraingwa.

Orutindo rukaba rwiine oburaingwa bwa mitazi 120 hamwe n'obukiika bwa mitas 1.4. Kikatwaara ebiro 15 okuruheza. Omu kureeba hakaba hariho abakozi 110 burizooba barikwenyigira omu kwombeka- ebiro 1650 by'okukora byoona hamwe. Bury'omwe ku yaakimanyire, baasiima ekanisa. Okugira ngu basiime abantu b'omu kyanga kandi bagaruremu amaani emyanya ebehinguririze, Gavumenti yaashohozza omurimo ogukozirwe omu

mpapura z'amahurire hamwe na TV. Okurabira omu murimo ugu, eiziina rya Mukama waitu Yesu rikahimbisibwa.

Ekanisa yaatunga ekitinisa kitarikuruga aha bantu b'omu kyanga kusha kureka na gavumenti. Abakuru hati nibaija aha muriisa kumushaba obuhwezi omu bikwateine n'ebya'abantu boona. Eminyeeto omu kyanga ku baabeire nibareetaho obuzibu, abaporisi baija aha muriisa. Omuriisa abagambira ati: Reeka twikirizibwe kwegyesa eminyeeto, reero nimwija kureeba empinduka." Ahabw'okureeba eby'okureeberaho by'omuriisa hamwe n'eka ye, abakuru baagira ekyetengo ky'okugira ngu abaana boona kuri nibaba nkabo. Abantu hati baatandiika kwikiriza ngu eki gavumenti etarikubaasa kukora, ekanisa nekibaasa.

- Ni bishuba ki bimwe ebi ekanisa egi yaasingwire?
 - Ekanisa n'abooro munonga, tibeine obubaasa.
 - Ekyetengo ni kihango, titurikubaasa kukikora.

Omugane 2

Omuriisa omwe kandi omwegyesa wa TCT akareeba aha mpinduka zoonza ezi yaareebire omu kyaro kye omu bwiire bwa puroguramu ya TCT. Yaagira ngu ekintu ky'okubanza ekyahindukire n'enyikiriza zaabo. "Baatakatandikire TCT, abantu baingi bakaba batarikufaaayo aha kyanga hamwe n'abandi. Aba ahakyo hamwe n'ekanisa bakaba nibateekateeka ngu nibetenga omuntu w'okwija (obundi kuruga America) kutukora gye n'okutukururanisa. Hati omu mazima nitumanya ngu Ruhanga atuhindwiire abahereza b'okugarukanisa." Omu disturikiti yaabo, ekyaro ky'omuriisa ugu nikyo kyaabeire kiri kibi. Abantu bakaba nibagamba ngu ekyaro kyabo n'ekirofa kijwiire kasasiro na manyuwa. Ahanyima y'okweega ekitabo kya 4 kandi n'okweega ngu Ruhanga naata omutima aha magara n'obuyonjo, ekanisa yaayerundaana kuhindura eki. Ekyaro kyoona kyiine za kamina, na bamwe baine ebipiira by'amaizi. Baakombeka n'orugo kwetoroora ekyaro kyoona, ruhango kugira ngu ente n'enjuba zikarutahamu kwetoroora omu mihanda. Kandi ebibiina by'abakazi nibikora kuboneza ekyaro buri rwa mukaaga rw'okubaza omu wiiki. Hati ekyanga kyaabo nikyeetwa ekyaro ekirikukirayo kuba ekiyonjo aba gavumenti hamwe n'ebitongore ebitari bya gavumenti. Abantu mazima bashemereirwe; nibashemererwa okutuura omu mwanya guboneire. Hati ekanisa ekahindura emitima yaabo kugita aha kindi kizibu: ahakuba ekyaro kiri milo 35 kuruga omu katere k'omu tauni, abantu nibarabanamu kugura eby'okurya. Ekanisa ekateebekanisa abantu b'okukora oruguuto rubi orurikukwatanisa ekyaro kyaabo n'oruguto orukuru, kugira ngu eby'entambura byanguhe. Reero omuriisa yaagira ekiteekateeko ky'okutandiika akatare akaabo, kugira ngu abantu barekya kutambura orugyendo ruringwa kuza omu tauni empango kugura ebi barikwetenga. Ekanisa yaataho timu y'ekyanga eyahikiririre omwebemezi w'ekyaro n'ekiteekateeko eki, kandi baatabarusya ababembezi boona kwaija kuhaana ebiteekateeko. Ekyaro kyabayamba kutandiika. Mbweni hati nibagura ebintu omu tauni kwaija kubiguza omu kyaro. Nibakozesa amagooba nk'eshaho y'ekyanga kuhwera abooro n'emburabure; eshaho nerebeererwa akakiiko. Buriijo baaguza ebintu byoona, nibatwaara ripota aha bebembezi b'ekyaro. Hati ekanisa eine akakwaate karungi n'ekyanga, abantu nibabaasa kutambura gye kandi baine eby'okurya ebirikumara, abaana tibarikukira kurwara ahakuba nibatuura omu mwanya guboneire, kandi abantu bashemereirwe kutuura omu kyaro kyaabo, batarikutegyerereza abandi ngu baije babahwere. Ruhanga asiimwe ahabw'empinduka egi!

- Ni bishuba ki bimwe ebi ekyaro kyabeire nikikiriza?
 - Itwe nitwetenga okwereeberera
 - Turi abooro munonga kugira ondiiho ou twaayamba.
 - Ekanisa neeta omutima aha shonga z'omwoyo zonka.
- Hakabaho ki ku baayetegyerereze amazima?

OKWEREEBA NA MUGYENZI WAAWE

Twaara edakiika nkye okureeba aha bwiire obu waabeire ohweire amaani nari akateekateeka ngu ekintu eki tikikubaasika. Nooteekateeka ngu omu mazima kikaba kitarikubaasika, nari okaba ori enkwaata y'ebishuba bya Sitaane? Bagana na mugyenzi waawe.

Ahanyima y'okubagana, teekateeka aha miringo ei orikubaasa kwijukiramu okwikiriza amazima ga Ruhanga ogundi murundi waabugana ekintu nk'ekyo. Oijssuke ngu Yesu akaija kutuhereza obusingye, konka sitaane naayenda kutugumya omu bukwaatwa.

Eishomo 9: Okuhindura Abandi Abeegi

Enshonga Enkuru

1. Tweena nitubaasa kuhindura abandi abeegi kandi nituteekwa kukikora.
2. Nitubaasa kuhindura abandi abeegi turikuba eky'okureeberaho kirungi

Ebikozeso

Tibiriho

Okuragiirwa Okukuru

OKUHAANA EBITEEKATEEKO OMU KIBIINA KIHANGO

Shoma Matayo 28:19-20.

- Ruhanga akaturagiira kukora ki?
 - Okuhindura abeegi amahanga goona
 - Okubabatiza
 - Okubegyesa kworobera byoona ebi Yesu yaaragiire

Nituragiirwa okuhindura abantu abeegi; harimu ebicweka bibiri omu kiragiho eki. Ekicweka ky'okubanza n'okureeba abantu bari kujunwa kandi bari kubatizibwa. Twaahereize kugamba oku twakubaasa kukora eki omu kitabo ky'okutendeka aha kubuurira engiri. Ekicweka kya kabiri aha kiragiho kya Yesu n'okuhindura abandi abeegi.

OKUHAANA EBITEEKATEEKO OMU KIBIINA KIKYE

Omu bubiina bukye muhaane ebiteekateeko aha bibuuzo ebi:

- Nituhindura abeegi tuta omu kanisa yaitu?
- Ni bintu ki ebi Yesu yaakozeire okuhindura abeegi?
 - *Akamara obwiire nabo*
 - *Yaabegyesa*
 - *Yabagaruramu amaani kandi yaabahiga*
 - *Yaabahereza*
- Ni mutaano oguri ahagati y'okuturi kuhindura abeegi hamwe n'oku Yesu yaahindwire abeegi?
- Nooha orikubaasa kuhindura abeegi?
 - *Abaikiriza boona batari abebembezi kusha.*

Ba Eky'okureeberaho Kirungi Ah'abandi

OKUHAANA EBITEEKATEEKO OMU KIBIINA KIHANGO

Ekicweka kimwe ky'okuhindura abeegi n'okugira ngu tutuureho omu magara gaitu turi eky'okureeberaho kirungi ky'abandi kukuratira.

Shoma Abafilipi 3:17 hamwe na 1 Abakorinso 4:6 and 11:1.

- Engyendererwaho za Paulo omu nyiriri ezi zikaba ziri ziiha?

Shoma 2 Abatesalonika 3:6-9.

- Ahabw'enki Paulo yaatoraine okutaakiira obuhwezi bw'esente?

Shoma Tito 2:7-8.

- Paulo akahabura ki Tito?

Shoma 1 Timoseo 4:12.

- Paulo akahabura ki Timoseo?

Omutwe oguri omu bicweka ebi byoona ni guuha?

Nitwetenga kuba eky'okureeberaho kirungi ah'abandi omu muringo ogu turi kutuuramu. Nitwetenga kuboreka n'amagara gaitu oku orikuba omwikiriza. Okuba eky'okureeberaho nigw'omuringo mukuru gw'okuhindura abandi abeegi. Titurikubaasa kwegamira obutumwa bwa sande omu kuhindura abandi abeegi.

OMURIMO OMU KIBIINA KIHANGO

Oku Omwegyesa Aratwaaze: Buuzi ebibuuzo ebi kandi okore orukarara rw'eby'okugarukamu aha rubaaho nari ekipande. Gyezaho kureeba ngu ekibiina kyaakwata aha myanya yooni ena ey'amagara. Reeka ekibiina kigambe ebi barikubaasa, konka ebiteiso bimwe biri ahaifo kukuhweera kwebembera ekibiina omu myanya y'amagara goona.

Ni bintu ki bimwe ebi omwikiriza musya arikuteekwa kweega kukora omu muringo gw'obwa Ruhanga?

- Okurinda obwiire
- Okureeberera gye esente
- Okukunda abakundwa baabo
- Okukuza abaana
- Okukora okusharamu
- Okukunda bataahi baabo
- Okubugabugana ebinyezzo
- Omurimo gwa burizooba

Hati reeba ahari buri kintu aharukarara oru kandi oteekateke aha bibuuzo ebi:

- Ebi n'ebintu ebi abandi baarikubaasa kweega baarikureeba amagara gaitu? Ahabw'enki nikwo nari tikaariko?
- Ni biiha omuri ebi ahu turi eky'okureeberaho kirungi? Ni biiha ebi turikwetenga kwongyeramu amaani?

Okuba ow'Omushana

OKUHAANA EBITEEKATEEKO OMU KIBIINA KIHANGO

Shoma 2 Abakorinso 3:4-6.

Okuhindura ondijjo omweegi tikirikumanyisa ngu noobanza waaba ohikire. Ku kyakuba kiri kityo, tihariho owakubaasa kuhindura abandi abeegi ahakuba tihariho n'omwe ohikire. Tweena nitukora enshobe. Omwanya gumwe ogu abantu barikubaasa kutwegyeraho n'eki turikuteekwa kukora twaazeza kukora enshobe, eky'okureeberaho nka twahutaaza ondijjo omu bigambo byaitu.

Shoma 2 Abakorinso 1:3-11.

Paulo akabugana ebinyezzo baingi konka nabwe yaabagana ebintu ebi n'abandi (orunyiriri 8).

- Ni nshonga ki zimwe ezi yaabeire naakira kushoboorora ahabw'enki yaabugaine ebinyezzo ebi? (orunyiriri 6,7)
 - *Ngu baahumurizibwe.*
 - *Babaase kukura omu kugumisiriza ku baarabugane okugyezibwa nikwo kumwe.*

Titushemereire kutiina kubagana amagara gaitu na twaaba nituhurira ngu tibirungi munonga. Omwikiriza musya naayetenga kumanya okusingura ebinyezzo. Nitwegyesibwa ngu omu magara gaitu g'obukristaayo nitwajja kubugana ebinyezzo kandi tushemereire kushemererwa ahabwaabyo (Yakobo 1:2-3; 12).

Twaaba nitwenda kuhindura abandi abeegi nitwetenga kubaikiriza kureeba amagara gaitu. Titushemereire kweshushaniriza ngu tuhikire. Omweegi nabaasa ata kubugana ebinyezzo kandi akasingura ebizibu by'ekibi ku baraabe batarikutureeba turikubugana ebinyezzo nibyo bimwe nari kumarah ebizibu? Ego eki nikibaasa kutinisa, ahabw'okuba entwaaza yaitu negira ngu tushemereire kwetwaaramu nk'abarikumanya byoona. Konka eky'okureeberaho ky'entumwa Paulo nikitworeeka ngu nangwa n'abebembezi baashemereire kubagana ebi barikurwaana nabyo.

OKWEREEBA NA MUGYENZI WAAWE

Na mugyenzi waawe, muhaane ebiteekateeko aha bibuuzo ebi bibiri:

- Nobaasa ota kwonyera kuba ow'omushana omu muringo ogu orikutuuramu?
- Teekateeka aha baikiriza basya omu kanisa yaawe. Hariho omuntu ow'orikubaasa kumara nawe obwiire kandi okamubeera eky'okureeberaho ky'okukuratira?

Eishomo 10: Reteera Ruhanga Ekitinisa

Enshonga Enkuru

1. Ekigyendererwa ky'amagara gaitu n'okureetera Ruhanga ekitinisa.

Ebikozeso

1. Akatabo k'omweegi (ti eiteeka) (SG): Ekigyendererwa kya Ruhanga

Obukristaayo n'enki?

OKUHAANA EBITEEKATEEKO OMU KIBIINA KIKYE (SG)

Hariho enkora y'akabi munonga omu kanisa ebiri ebi ahu abantu baarikuteekateeka ngu obukristaayo nibukwaata ahariitwe kusha. Konka obu tibwo butumwa bwa Baibuli.

Omu bubiina bukye, Shoma enyiriri za Baibuli reero ogarukemu ebibuuzo.

Ekigyendererwa kya Ruhangas

Okutandiika 12:1-3

- Ni ahabw'ekigyendererwa ki eki Ruhanga yaaherize Abrahamu omugisha?

Okuruga 14:1-4

(Waaba otarikwijuka omugana ugu, shoma eshuura yoona kumanya ebi Ruhanga yaakozeire.)

- Ahabw'enki Ruhanga yaagangaize omutima gwa Faraaho?

Ezekieli 36:22-30

- Ahabw'enki Ruhanga naagamba ngu naija kukora ebi bintu byoona omu kicweka eki?

Ni mutwe ki oguri omu bicweka ebi byoona?

OKUGAMBA EBYARUGAMU

Oku Omwegyesa Aratwaaze: Hurikiza eby'okugarugamu kuruga omu bibiina. Gyezaho kureeba ngu baareeba enshonga enkuru y'ebicweka bya Baibuli ebi-ngu Ruhanga naayenda kwereteera ekitinisa. Obu nibwo butumwa bwa Baibuli.

Buri kintu kyoona eki turikukora kishemereire kutuma abandi baareeba Ruhanga waitu ariwe ashemereire kuramibwa, orikukirayo oburungi kandi ow'okutangaaza. Nituteekwa okuteetaho amaisho kureka ahari Ruhanga. Nituteekwa kutuuraho omu muringo gw'okugira ngu abantu bareeba oku Ruhanga waitu ari ow'amaani kandi baakunda kumuramya.

Seduraaka, Mesaaki, na Abedeneego

OKUHAANA EBITEEKATEEKO OMU KIBIINA KIHANGO

Hariho emigane maingi erikworeka oku Ruhanga arikuhimbisibwa konka kaatuhurikize gumwe aha migane egi:

Oku Omwegyesa Aratwaaze: Kozesa obukugu bwaawe bw'okugamba omugane okugamba omugane gwa Seduraaka, Mesaaki na Abedeneego oguri omuri Danieli eshuura ya 3. Oyegyezemu kare kureeba ngu waatamu ebicweka bikuru byoona:

Ebicweka bikuru by'okutamu waaba noogamba omugane:

- *Nebukadeneza akeyombekyera ekishushani kandi yaaragira bury'omwe kukiramy ku baarahurire amaraka g'enzaamba. Abo abatarorobire bakaba nibaija kunagwa omu kikome ky'omuriro.*
- *Seduraaka Mesaaki, na Abedeneego baayanga kukiramy.*
- *Ku baabuzibwe ahabw'enki, baagarukamu ngu bakaba baatarikutiina omuriro ahabw'okuba Ruhanga akaba nabaasa kubajuna. N'obu Ruhanga ataakukikozeire, bakaba batarikwenda kuramya ekishushani kya ruhanga w'ebishuba eki omugabe yaateireho.*
- *Nebukadeneza yaagira ekiniga kingi. Yaaragiira okukoomera omuriro emirundi mushaanju ngu gubone gwaaka n'amaani.*
- *Seduraaka Mesaaki na Abedeneego baanagwa omu kikoomi ky'omuriro gurikubuguma. Ekikoomi kikaba nikyotsya kugira ngu endimi z'omuriro zikaita omuserukare owaabanagire omu kikoomi.*
- *Omugabe ku yaarebeire abashaija bana,batari bashatu,baarukutambura omu muriro,hataine oku babeire,yaabaragiira kurugamu*
- *Bwanyima y'ekyo, Nebukadeneza yaahimbisa Ruhanga kandi yaataho ekiragiro ky'okuzibira abantu b'omu mahanga hamwe n'endimi zoona kurogota ahari Ruhanga wa Seduraaka, Mesaaki na Abedeneego.*

OKUHAANA EBITEEKATEEKO OMU KIBIINA KIHANGO QUESTIONS

- N'enki ekyabeireho omu mugane ugu?
- Ruhanga akaahebwa ata ekitinisa?
 - *Aha kutandiika kw'omugane, Nebukadeneza akaba naayenda bury'omwe amuramye. Ahamuheru rw'omugane, yaajumbura ngu ni Ruhanga wenka ow'amazima kandi yaamuramya.*
- N'enki ekyabeire ahari Seduraaka, Mesaaki na Abedeneego?
 - *Bakanagwa omu kikoomi ky'omuriro konka Ruhanga yaabajuna*

Ruhanga akakozesa Seduraaka, Mesaaki na Abedeneego okwereteera ekitinisa omu mugane ugu. Kwonka bakabugana okugyezibwa kuhango. Obumwe Ruhanga naatwikiriza kubugana okugyezibwa kuhango kugira ngu tubaase kumuhereza ekitinisa. Okugira ngu Seduraaka, Mesaaki na Abedeneego bakabugana omugabe kandi barikumanya ngu nibaija kunagwa omu muriro kikaba nikibaasa kutuma baahwa amaani. Baakesiga Ruhanga omu bwijwiire, n'obu baabugaine ekizibu ky'okubamaraho. Titurikumanya ni bizibu ki bihango ebirikwaija twaasherura kuhereza Ruhanga ekitinisa, konka n'obu ebintu byakuba bibi, nitwetenga kumworohera.

Okureeba Ekitinisa kya Ruhanga

OKUHAANA EBITEEKATEEKO OMU KIBIINA KIHANGO

Shoma 2 Abakorinso 3:18.

- N'enki ekirikutubaho ku turikureeba ekitinisa kya Ruhanga?
 - *Nituhindurwa*
- Nooteekateeka ngu ahabw'enki kiri kityo?
 - *Kugira ngu tworeeke ekitinisa kya Ruhanga ah'abandi kandi tworekye abandi oku ari ow'obushoboorozi, ow'okutangaaza kandi orikwera.*
- Nitubaasa tuta kutuma eki kyabaho?

- *Tweena nitubaasa kutuma eki kyabaho ku turaate omu nkora omumagara gaitu amashomo agu twaaherize kweega.*

OKWEEREBA NA MUGYENZI WAAWE

Waarabugaine omuntu orikworeka ekitinisa kya Ruhanga ahariwe, ekirikumanyisa ngu okuba haihi nabo kusha okatandiika kukunda Ruhanga n’okukiraho? Obutoosha eki nikireetwa omuringo ogu baarikutwaazamu abandi, oku baarikugamba, nari emigane eyi baarikugamba oku Ruhanga arikukora omu magara gaabo’.

Na mugyenzi waawe, bagana aha muntu omu magara gaawe ori kukugaruramu amaani omu muringo ogu. N’enki ekiri aha muntu ogwo ekirikworeka ekitinisa kya Ruhanga kandi kikakugaruramu amaani? Noobaasa kubeegaho ki?

OKUHAANA EBITEEKATEEKO OMU KIBIINA KIHANGO

Teekateeka enyima oijuke amashomo goona agu oyeegire. Ni bintu ki ebi orikubaasa kukora okureetera Ruhanga ekitinisa? Haandiika orukarara aha rubaho nari ekipande ky’orupapura.

- Kunda bataahi baawe, nangwa naabo abagumire kukundwa.
- Yombeka obukama bwa Ruhanga omu myanya y’amagara yoona.
- Hereza abakyene.
- Kozesa ebi twiine okwombeka obukama bwa Ruhanga
- Kora n’amaani
- Oreeberere ebihangirwe.
- Sherura kandi ote omu nkora amazima ga Ruhanga
- Ohindure abandi abeegi.

Oku Omwegyesa Aratwaaze: Hurikiza eby’okugarukamu kandi oyongyereho eby’okugarukamu eby’aharuguru baagira eki baatagambaho. Kozesa okuhaana ebiteekateeko oku kureeba ngu ekibiina kyaijuka enshonga enkuru kuruga omu mashomo 1-10 mutakagiire aha eishomo erindi.

Eishomo 11: Tushemereire Kukora Tuta Ebintu Ebi Byoona?

Enshonga Enkuru

1. Nitwetenga kwegamira Ruhanga.
2. Ruhanga agyendereire ngu tutuureho nk'omutwe gw'abantu, kandi nk'omubiri gumwe. Titushemereire kutuuraho tweenka kandi tutarikwegamira bagyenzi baitu.

Ebikozezo

Tibiriho

Okwanjura

OKUHAANA EBITEEKATEEKO OMU KIBIINA KIHANGO

Nikireebeka ngu omu wiiki nkye z'enyima tukakora orukarara ruraingwa rw'ebiturikuteekwa kukora. Eki nikibaasa kutuuma twaahurira tutarikubaasa.

Shoma Matayo 11:28-30.

Omu nyiriri ezi ("Mwegure omugamba gwangye kandi munyegyereho"), ekigambo 'omugamba' kiine amakuru g'okwegyesa'. Yesu akagamba eki ahanyima y'okwegyesa aha rushozi. Ku turikushoma obutumwa bw'aha rushozi, nitwaija kureeba ngu tikyanguhi kubuta omunkora. Kandi nabwe tituhikiriire (Matayo 5:48).

- Ahabw'enki Yesu yaagambire ngu kyanguhi kukora ("omugamba gwangye gwanguhi")?
 - *Ahabw'okuba taaratuteekateekire ngu tukikore tweenka ahabwaitu.*

Shoma Yohaana 15:1-8

- Omuzaabibu nooha?
- Amataagi nooha?
- N'enki ekirikubaho kuturi kuguma omuriwe?
- N'enki ekirikubaho twaaba tutagumire omuriwe?
- Nooha orikuheebwa ekitinisa twaaguma omuriwe?

OKUHAANA EBITEEKATEEKO OMU KIBIINA KIKYE

Omu bubiina bukye, muhaane ebiteekateeko ahari eki kirikumanyisa "okuguma" omuri Yesu. Tukabaasa tuta kukora eki? Kora orukarara rw'emiringo etari kushushana.

OKUGAMBA EBYARUGAMU

Oku Omwegyesa Aratwaaze: Hereza ebibiina obwiire bw'okuhaana ebiteekateeko reero bwanyima ohurikize eby'okugarukamu byaabo. Hanu hariho bimwe ebirikubaasa kuba eby'okugarukamu:

- *Gyenda kuramyi n'ekanisa*
- *Shaba*
- *Twaara obwiire na Ruhanga.*
- *Shoma Baibuli*
- *Sherura obuhwezi kuruga ahari Ruhanga.*

Ekitabo ky'Ebyakoziawe Entumwa

OKUHAANA EBITEEKATEEKO OMU KIBIINA KIHANGO

Ebyakozirwe Entumwa n'ekitabo kirikutangaaza. Yesu akaba aherize kuzooka kandi yaabugeine na abeegi abaheerize okuragiirwa okukuru (Matayo 28:18-20). Abeegi bakaba nibamanyanga ngu okuragiirwa oku tikurikubaasika. Ahanyima y'okuzooka kwa Yesu, hakaba hariho abantu 120 bonka beerundeine hamwe. Abantu bakye aba bakaba biine obujunanizibwa bw'okwegyesa ebi Yesu yaayegyeise byoona. Omutwe gw'Abaisraeli gwoona gukaba gugyereizeho kuzibira enyegyesa ya Yesu. Kandi obwo, Yesu akaba aherize kubaambwa, n'ahabw'ekyo bukaba buri obwiire bw'akabi aha baikiriza. Abeegi bakaba baine omurimo mukuru omumaisho gaabo, kandi obwo tihariho n'omwe omuribo owaabeire aine obukugu nari obwegyese. (Ebyakozirwe Entumwa 4:13).

Shoma enyiriri ezi ahaifo. Abaikiriza bakaba nibakora ki omuri buri runyiriri?

- Ebyakozirwe Entumwa 1:14
- Ebyakozirwe Entumwa 2:42
- Ebyakozirwe Entumwa 4:24
- Ebyakozirwe Entumwa 6:4
- Ebyakozirwe Entumwa 10:9
- Ebyakozirwe Entumwa 12:5 na 12
- Ebyakozirwe Entumwa 14:23
- Ebyakozirwe Entumwa 16:25
- Ebyakozirwe Entumwa 21:5
- Ebyakozirwe Entumwa 28:8

Bakaikiriza omu maani ga Ruhanga kandi yaabahwera. Waaba otarikumanyanga gye ekitabo ky'Ebyakozirwe Entumwa, nooteekwa kutaho obwiire bw'okukishoma. Ruhanga akakora eby'okutangaaza bingi kandi ekanisa yaatandiika kukura kuruga ahari 120 kuza omu nkumi z'abantu omu ndembo nyingi. Oijuke ngu Ruhanga akatandiika kukura ebintu ebi n'abantu ba buriiho baategyesibwe. Ruhanga taarakozeise abantu b'amaani nari abeine obushoboorozi munonga

Shoma 1 Abakorinso 1:26-31

- Ruhanga naakozesa baaha?
- Ahabw'enki?
 - *Kugira ngu haatagira owayehimbisa kandi abantu boona bamanyanga ngu ni Ruhanga orikukora ebintu bikuru kandi eby'amaani.*

Shoma Yohaana 16:5-14.

- Ahabw'enki Yesu naagamba ngu n'abw'oburungi bwaitu kugira ngu agyende?
- Ni mumiringo ki ei Omwoyo Orikwera arikwaija kutuhwera?

Abeegi bakaba baine obusaasi ahabw'okugira ngu akaba naagyenda, kandi kiba kiri kirungi ngu agyende, kugira ngu ayohereze Omwoyo Orikwera. Kuri Yesu yaagumire omu nsi akaabaire ari omu mwanya gumwe, n'obu twaakutambwire kuza kumureeba titukabaasize kutunga obwiire bw'okugamba nawe wenka hariho n'abandi abarikumusherura nk'abantu. Konka Omwoyo Orikwera nabaasa kuba naitwe tweena, ahu turi hoona kandi obwiire bwoona. Omwoyo Orikwera atuura ayeteekateekire kutuhwera n'okutwebembera ku turamushabe. Nabaasa kutuhwera kusingura ebikumire hamwe n'okugyezibwa. Titurikwetenga kubugabugana ebirikutuhiga twenka.

- Eki nikimanyisa ki ahariitwe omu magara gaitu aga burizooba?
- Ni omu miringo ki eiturikubaasa kutuuraho omu maani g'Omwoyo Orikwera?
 - *Ba omuntu w'okushaba*
 - *Shoma Baibuli obutoosha okwetegyeriza eki Ruhanga arikwegyesa.*
 - *Shaba Ruhanga kutuhwera kandi n'okutwebembera. Oijuke ngu naayenda kukwatanisa naitwe omu murimo gwaitu gwoona.*

EKICWEKA B:

Ekacweka1: Ahu Twaahika Nihingana Ki?

Enshonga Enkuru

1. Okujyaguza okugyenda omumaisho kwaitu kandi n’okuteekateeka ebindi bintu ebi turikwenda kureetaho empinduka.

Ebikozeso

1. Ebishushani by’okureeberaho: Orupapura ruriho Empinduka Ezirikukira kubaho (kopi emwe buri kibiina)
2. Akatabo k’omweegi (ti eiteeka) (SG):
 - a. Ekyanga Ekihindukire
 - b. Empinduka ezirikukira kubaho
3. Orupapura rw’ekipande hamwe n’eby’okuhandiikisa by’okuteera za mapu.

Ahu twaahika nihingana ki?

OKUHAANA EBITEEKATEEKO OMU KIBIINA KIHANGO

Shoma Zaaburi 145:6-7 na Nehemia 8:12.

- Enyiriri ezi ziine biha ebirikushushana?
 - *Nizigaamba aha kujyaguza -okujyaguza ebirungi ebi Ruhanga akoziire hamwe n’okumanya kw’ekigambo kya Ruhanga.*

Teekateeka enyima nk’emyaka 5-6 ehingwiire.

- Ni mpinduka ki zimwe mpango ezaabeireho omu kyanga eki ezi tushemereire kujyaguza?
- Ruhanga akahereza ata omugisha mwingi?

OKUHAANA EBITEEKATEEKO OMU KIBIINA KIKYE (SG)

Amakanisa gamwe gahindukiire omu maani

Oku Omwegyesa Aratwaaze: Shoma omugane gw’ekyanga ekihindukiire, reero mwebaganisemu omu bubiina bukye kandi muhaane ebiteekateeko aha bibuuzo ebiri ahamuheru.

Ekyanga Ekihindukiire

Ogu n’omugane gw’ekyanga kyonyiine. Omuri 2005, abantu baingi b’omu kyanga eki bakaba bari abooro. Amaju gaabo gakaba gorobi kandi g’ebyondo. Gagubiire ahansi kandi gaarikutura. Emisiri ekaba eri nka kilomita 2 kuruga omu kyarokushuma ahansi omuruhanga. Endwara zikaba zikanyire kandi n’eby’obuyonjo biri ahansi munonga. Hakaba hatariho za kamina kandi amatungo gateine buraro kureka gaarikugyendagye omu kyanga. Amaju gamwe gakaba gaine orugo aha miryango kuzibira amatungo kutaaha omu nju konka gaguma omu mbuga ahu abaana baarukuzanira. Abaana bakye nibo baabeire nibaza aheishomsro; baingi bakaba baruga omu eishomero ahakuba eishomero rikaba riri hare. Owaabeire naashoma munonga akaba ahika aha guredi ya 9 batakagiire omu disitirikiti eyindi kugumizamu kushoma. Abaana baingi bakaba nibashoma emyaka mikye.

Aha bwiire obwo tiheine murimo gwoona ogu baabeire nibakora hamwe. Omuntu owu baabeire nibamanya kandi nibakunda ku yaabeire arwaara bamureteera amate na sukaari. Oihireho okumanya ebyetengo baingi omu kyanga kyaabo, tibarayambire muntu weena kurenga aha maka gaabo n'abanywani.

Eizooba rimwe abantu bakye kuruga omu kyanga baatabarukibwa kwaija omu kutendeka. Omu kutendeka oku baayega ngu Yesu tarafiire kugira ngu baze omu eiguru kusha, kureka akafa kugira ngu agarure byoona busya. Baashuba bayeega ngu nibetenga kukura omu bicweka 4 by'amagara byoona (omubiri, omu mwoyo, akakwaate n'abandi kandi n'obwengye) kandi ngu nibetenga kukunda kuherezayo hamwe n'okukozesa ebi baine. Abo abaagiire omu kutendeka baagaruka kandi baatandiika kwegyesa abandi omu kanisa ebi baayegyeire.

Abo abagiire omu kutendeka baajumbura ngu hariho abakyeene baingi, konka bakaba baatakagyezahoga kuhwera abantu aba ahakuba bakaba batari b'amaka gaabo nari abanywani. Baatandiika kushohora buri muntu kuhwera abo abaabeire nibetenga kuhwerwa omu kyanga. Omu mazima bakakora ebintu byanguhi nka okureeta eby'okurya aha bantu bakuziire nari abarweire.

Ahanyima y'emyeezi mukaaga baaza omu puroguramu ya TCT. Ahanyima y'okutendekwa baakora akakiiko k'obuhereza omu bwijiire omu kanisa kandi baatandiika kubugana hamwe buri wiiki kuhaana ebiteekateeko aha bizibu ebi bareebire omu kyanga. Baarekyeraho kureeba abantu bamwe nk'abaikiriza kandi abandi nk'abatari baikiriza, kureka bareeba owu bashemereire kuhwera kurugirira aha byetengo byaabo. Buri rukiiko bakaba bahaana ebiteekateeko aha byetengo ebi bareebire omu wiiki ehingweire, batoorana ekizibu kandi bagyezaho kuhwera eka egyo. Obuhwezi bukaba butashushana. Eka ku yaabeire eba erwire munonga kuhinga nari kusharura emisiri yaabo obwo timu kuruga omu kanisa ekaba egyenda kukikora. Enju y'omuntu ku yaabeire egwa nari etari nungi y'okutuuramu, obwo bakaba bombeka enju nsya. Ahabw'emirimo y'okubanza, ba memba b'akakiiko bakaba baherezayo esente munonga. Esente ezaabeire nize tengwa zikaba ziri nkye. Kaingi bakaba nibakozesa ebikozeso ebiriho.

Abantu b'omu kyanga bakatangaara ku bareebire eki ekanisa yaabeire nekora kandi bababuuza ahabw'enki baabeire nibahwera. Babagana nabo ngu "Omu Baibuli, Yesu naatwegyesa ngu nitwetenga kureeberera n'okukunda bataahi baitu. Ruhanga akatukunda kandi naitwe nitwetenga kworeka egyo Rukundo aha bandi." Abantu baakyakiira munonga kandi baatandiika kwaija omu kanisa n'okuba abaikiriza. Akakiiko kagumizamu kumara obwiire bwaabo barikuronda emigisha y'okuhwera kandi n'okureeta ekanisa yona kwejumbira omu kuhwera.

Ahanyima y'emyeezi mikye, baagira okutendekwa kwakabiri. Nk'ekicweka kimwe aha kutendeka oku, bakaba biine kuteera mapu y'ekyanga kyaabo nk'oku baabeire nibaroota ngu nikiija kuba kiri omu bwiire b'emyaka 10-20. Omu mapu egi, baatamu eishomero, amaju ga cementi n'amatafaari, enguuto zirikuza omu misiri yaabo hamwe n'ebiyoma by'okukora omuri za faamu.

Ekibiina kyagumizamu kirikubugana buri wiiki konka ku baabeire babugana bakaba bashaba kugira ngu Ruhanga abooreke entambwe z'okubanza ezi baakubaasa kukora kugira ngu mapu yaabo ehikirire. Obwiire obwo bakaba baine otuhanda turikuza omu misiri yaabo. Ekirooto kyaabo kikaba kiri eky'okutunga ebigaari by'okwegura ebihingwa byaabo. Omu kushaba bakaba baturira ngu nibabaasa kwombeka enguuto zirikuza omu misiri yaabo. Baayetegyereza ngu ebintu ebi barikuroota tibirikwija kuhanuka omu mwanya, kureka bakaba nibetenga kukura n'amaani kandi bakashaba ngu Ruhanga ahereze omugisha emirimo y'emikono yaabo.

Baarundana bury'omwe owaabeire naakunda kuhwera kandi baatandiika kushanjuura rumwe aha nguuto zirikuza omu misiri. Ahabw'okuba ekanisa ekaba eyiine eiziina rirungi ry'okuhwera omu kyanga, abantu baingi bakaija kubahwera. Omurimo gukatwaara wiiki nkye kuhwa. Ku gwaahweire bakaba bashanjwire akahanda nk'obukiika bwa mitas 1.5. enguuto ekaba eine oburaingwa bwa kilomita 2. Omu mwaka ogundi, bakaheza enguuto eitaano omu kyanga kyaabo.

Bwanyima y'okushanjuura akahanda k'okubanza. Bakagura ebigaari by'ahansi kandi byatandiika kwegura ebihingwa byaabo. Abandi omu kyanga baatandiika kubatooreza. Eizooba rimwe ku baabeire babugaine, omwe

yaabagambira ngu ekyanga ekindi nakyo kyiine ekigaari kikwatsire ahari piki kirikwegura ebihingwa. Baakora hamwe kugyezaho kutaho enkora y'okubahwera kukora nikyo kimwe. Bakashaba obwengye kandi baahurira ngu Ruhanga naabawera kutunga ebiteekyerezo Birungi.

Abantu omu kanisa baagumizamu barikukora za purojecti nyingi nka okwombeka enguuto, amaziba, kamina, amaju hamwe n'ebindi. Ab'omukanisa bakashemererwa ahabw'okubaasa kukora za purojecti ahakuba bakazireeba nk'omuringo ogu babaasize kuramya kandi bakahereza Ruhanga.

Konka ekyanga kikaba kikiine ebyetengo bingi kandi bakaba baine ekyetengo ky'okukora purojecti mpango ezirikubaasa kutuma Ruhanga yaahebwa ekitinisa n'okukiraho. Bakaba babugana kushaba kandi n'okubuza Ruhanga eki bashemereire kukora. Baasharamu kwombeka orutindo. Ekaba eri purojecti mpango kandi erikwetenga esente nyingi kandi bakaba batarikumanya gye oku baarakikore. Obwiire obu abebembezi ba gavumenti bamwe bakaba baabeire abikiriza kandi baatunga obushagiki bwa gavumenti bw'okubahereza ebyoma ahabwa purojecti. Babagana okworekwa kwaabo nab'omukanisa kandi baingi baaherezayo esente nari okwehayo kukora. Ahamuheru, baahurira ngu hati n'obwiire bw'okutandiika. Bakaba baateine ebikozeso byoona konka baasharamu kutandiika. Ku baatandiikire, abantu baingi omu kyanga baareeba ekirikubaho kandi baayehayo kukora nari kureeta esente. Burizooba, ebiconco by'ebikozeso n'esente bikaba nibimara kugumizamu nibakora omurimo. Ahamuheru orutindo rwaabo gwaahwa.

Kwonka omu kwa Mwenda 2009, omwegyemure mwingi gwatwaara orutindo. Oihireho kugira ngu buri muntu akafeerwa baingi, baakerundaana hamwe kwombeka orutindo rwakanya kakye. Omwegyemure mwingi gwashuba gwabaho omu kwikumi na kumwe 2009 gwarutwaara. Bashuba baija hamwe baakora orutindo ruhango kandi rugumire, abantu baakayo ebibanja kugira ngu babaase kwombeka omu mwanya gurigye kandi buri muntu yaahayo ebikozeso nk'oku yaabeire aine. Gavumenti ekashemererwa munonga baahika ahakweeta TV y'aha mwanya kwaija kukwaata ebishushani by'ekanisa eyagumizemu erikukunda ekyanga kyaabo. Amahurire gaabuga hoona omu eihanga.

Omu bwiire obu bakaba nibatunga okutendekwa okundi. Buri myeezi 4-6 bakaba batunga okutendeka kusya kurikukwaata na munonga aha bukugu obu barikwetenga. Okutendeka kumwe kukaba kuri aha by'amagara. Ahanyima y'okutendeka oku, bakamanya ngu emibiri yaabo ekabaheebwa kuruga ahari Ruhanga kandi bashemereire kugireeberera gye. baayetegyereza ngu tikiri mubuteeka kurwara obwiire bwoona. Nk'ekicweka kimwe aha kutendekwa bakaba baine amashomo 20 g'ebibiina bikye garikugamba aha buyonjo hamwe n'okujanjaaba endwara ezirikukira kubaho. Akakiiko k'obuhereza obwijwiire kaabugana kandi baasharamu ngu ebibiina bikye byaaba bibugaine aha kanisa (nk'abakazi hamwe n'eminyeeto) bongyereho eishomo by'amagara ahanyima y'eishomo rya Baibuli. Abantu b'omukanisa ku baayegyeire amashomo g'eby'amagara, babita omunkora omu magara gaabo. Bataahi baabo bareeba eki baabeire nibakora nabo bata eishomo omu nkora. Hati bury'omwe omu kyanga naakozesa kamina, nibanaaba omu ngaro batakariire hamwe n'okuteeka. Amatungo gaine oburaro niboozya esowaani n'ebindi kandi nibayonja amaka gaabo. Bury'omwe aine ebijwaaro bishemereire kandi byogyenze. Buri nju eine omusiri gw'emboga kandi nibarya emboga. Abantu hati tibarikukira kurwara kandi nibabaasa kwejanjaaba shana bwaaba buri oburweire bw'amaani.

Okutendeka okundi kukaba kuri aha bushwere n'amaka. Omu kutendeka oku, bakeega obujunanizibwa bw'omukazi n'omushaija-ngu omushaija akunde omukazi kandi omukazi ayorobere omushaija. Abashaija baarekyeraho kuteera abakazi baabo. Omushaija omwe akabagana ngu akaba atarikukunda omukazi we. Akaba atakamutwaaragaho ahantu hoona nari kumworeka Rukundo. Boona bakaba baine enaku. Ahanyima y'okutendekwa, yaamanya ngu omuringo ogwarikutwaazamu omukazi we gugwaire. Baibuli nemuragiira kukunda omukazi we reero yaatandiika kutwaaza gye omukazi, hati, naagira ngu baine obushwere burungi kandi nibakundana. Nibashemererwa okuba hamwe kandi nibakora ebintu baingi hamwe.

Ekanisa nayo ehindikire munonga. Enyimaho, abantu baingi bakaba baija rimwe na rimwe. Hati buri muntu ayeheireyo omu kanisa. Tibarikwaija omu savisi ya sande kusha kureka n'omu bubiina bukye. Nibashoma Baibuli zaabo kandi na kimwe ky'ikumi kyeyongyeire.

Ekanisa ekyaijuka eizooba eri bateera mapu. Kikaba nikireebeka nk'ekitarikubaasa kubaho ngu omu myaka 10=20 nibaija kutunga buri kimwe ekiri aha mapu. Konka hati ku barikugikwaata betegyereza ngu omu myaka etaano yonka byoona babitungiire. Hati baine emotooka mpango kandi baboneize n'enguuto kugira ngu emotooka egi erabemu. Biine ebyoma by'okukozesa omuri za faamu nka turakita y'okuhinga, baine n'eikorero haihi n'ekyanga kyabo ekirikumanyisa ngu nibaabasa kuguza ebihingwa byaabo aha beeyi y'ahaiguru. Baine eishomero n'eirwariro rikye kandi bury'omwe aine enju y'amatafaari kandi eine cementi ahansi. Akakiiko k'obuhereza omu bwijwiire nikagumizamu kubugana konka za purojecti ezi barikuteekateekaho n'ez'ebyangana ebibehinguririze ahakuba tibakyeine kyetengo kyoona omu kyanga kyaabo.

- N'enki ekyabeireho omu mwanya ugu?
- Ni bintu ki ebihindukireho ebi baakoziire?
- Bakabikora bata?

OKUGAMBA EBYARUGAMU (waaba nookozesa obubiina bukye)

Eki n'eky'okureeberaho ky'ekanisa eyaatiire omunkora ebi baabeire beegyeire omu kutendekwa. Bakagyezaho nk'oku barikubaasa, baayashaasha munonga, kandi Ruhanga akabahwera. Empinduka nizibaasa kubaho omu byanga byoona ebirikusherura obuhwezi bwa Ruhanga kandi bakamworobera. Gwaaba gutari omugane gwaawe hati, obwo nooyetenga kusharamu yaaba nooyenda ngu gube ogwaawe omu myaka 2 nari 3. Nookunda okukora n'amaani kugira ngu kibeho?

Empinduka Ezirikukira Kubaho

OKUHAANA EBITEEKATEEKO OMU KIBIINA KIHANGO (SG)

Oku Omwegyesa Aratwaaze: Reeba aharukarara oru rw'empinduka ezirikukira kubaho. Shoma buri nshonga n'eiraka rihango kandi oshabe abeegi kuteekateeka yaaba empinduka egi etakabagaho omu kyanga, ekabaho kakye okukiraho kakye, okwongeraho kakye nari ekabaho munonga. Ahabwa buri nshonga, bashabe baimutsye emikono kurugirira aha bwingi bw'empinduka egi yaabeireho:

- Tihariho empinduka – ayereze ekitomi
- Empinduka nkye – ayereze omukono kuhika aha mabega
- Okukiraho aha mpinduka nkye – ayereze omukono kuhika aha mutwe
- Empinduka mpango – ayereze omukono ahaiguru omu mwanya.

Shaba buri mweegi kuguma ayereerize omukono kurugirira oku baarikuteekateeka ahari buri nshonga. Ogire ekiwahandiika aha rubaju rwa buri nshonga orikuta omu bugufu eby'okugarukamu by'abeegi.

Empinduka ezirikukira kubaho

Eby'omubiri

- Eby'amagara birikwongera kubonera
 - Okwombeka kandi n'okukozesa za kamina.
 - Okugira amaizi marungi
 - Okuzibira n'okujanjaaba endwara ezirikukira kubaho.
 - Okuhinga emboga hamwe n'okurya eby'okurya birimu ebiriisa.
 - Okukozesa ekiina kya kasasiro hamwe n'okutanaganaga kasasiro
- Entasya eyeyongyeireho
 - Enguuto nungi nari entiindo
 - Okushukyerama amaizi emisiri okweyongyeireho
 - Amagoba geyongyeireho kuruga omu kuhinga
 - Okukyendeza amabanja hamwe n'okurebeerera gye esente

- Okuhwerana omu mwanya gw'okushashura abakozi nk'enyimaho
- Amaju gahamiire

Obukwaate n'abandi

- Obushwere burungi
 - Okwetegyereza emirimo y'omushaija/omukazi
 - Okugarukanisa amaka agashenyukiire
- Obukugu burungi bw'okukuza abaana
- Okukorera hamwe emirimo y'ekyanga
- Akakwaate karungi n'abategyeki ba gavumenti

Akakwaate na Ruhanga

- Omubare gw'abaikiriza abarikuza omu kanisa gweyongyeireho
- Abantu baingi nibenyigiira omu kweega Baibuli
- Okuha kimwe ky'ikumi kweyongyeireho
- Abantu baingi baarikwenyigiira omu bikorwa bya Rukundo nari ogundi muringo gw'okuhereza abandi
- Okukyeendera kw'obutabanguriko omu kanisa hamwe n'agandi makanisa.
- Abaikiriza abarikwehayo munonga
- Okweyongyera kw'okubuurura engiri omu myanya egumire.

Ebiteekateeko/obwengye

- Okweyongyera kw'omubare gw'abaana abarikuza aheishomero
- Okweyongyera kw'okumanya ebi:
 - Eby'amagara
 - Esente
 - Obuhingi
 - Baibuli
 - Obukugu omu kukuza abaana

Ebindi

- Ruhanga naahebwa ekitinisa – ekyanga, gavumenti hamwe n'emyanya ebehinguririze nibamanya ngu Ruhanga niwe enshonga ahabw'empinduka omu bantu hamwe n'ekyanga kandi ashemereire ekitinisa
- Ekanisa nemanya oku erikureeta okugyezibwa n'ebizibu ahari Ruhanga kusherura eby'okugarukamu. Ekanisa neyorobera Ruhanga kandi nereeba oku ari omwesigwa kurinda endagaano ze.
- Ekanisa nebaasa kureeta empinduka omu byanga ebigyehinguririze.

Oku Omwegyesa Aratwaaze: Ahabw'ekicweka ky'ahamuheru (ebindi) reeba yaaba ekanisa eine emigane mirungi y'okubagana nk'eky'okureeberaho ahabwa buri nshonga.

Okuta Omunkora Ebi Tweegyire

OKUHAANA EBITEEKATEEKO OMU KIBIINA KIHANGO

Orupapura oruriho empinduka ezirikukira kubaho nirugamba aha bintu ebikiziire kubaho kurabira omu puroguramu ya TCT. Hariho n'ebindi bintu bingi ebi tweegyireho kurabira omu kutendekwa.

Garuka otekateeke ahari buri kitabo ky'okutendeka omu bukugu (bihandiikirwe ahaifo) reero ogyezeho kwijuka amashomo gatarikushushana hamwe n'enshonga nkuru, okukira munonga ezitaagambwaho omu mpinduka ezirikukira kubaho. Hariho ezindi nshonga kuruga omu kutendekwa kwoona eziteirwe omunkora omu kyanga kyaawe? Gira ebi wahandiika aha rupapura rw'empinduka ezirikukira kubaho ez'ebintu ebi oreebire nari eby'orikwenda kwongyera kureeba.

Oku Omwegyesa Aratwaaze: Gyezaho kureeba ngu waayemanyiza n’okutendekwa oku kugira ngu ohwere ekibiina kubyaijuka.

- Eby’amagara
- Obushwere n’okukuza abaana
- Eby’okureeberera esente
- Obuhingi (okuhinga hamwe n’okuriisa)
- Okubuurira engiri

Nitweenda ngu tuze nkahi?

OKUHAANA EBITEEKATEEKO OMU KIBIINA KIKYE

Omu mugane gw’ekyanga Ekihindukiire (*akatabo k’omweegi*), tukagambirwa ngu abantu b’omukyanga bakateera mapu, reero baija hamwe kushaba Ruhanga kubebembera kandi n’okusharamu oku baakubaasa kukora kuhika aha kureeba ebintu birikubaho

Omu bubiina bukye bw’abantu nka 4-6, mushabe kandi muhaane ebiteekateeko aha mpinduka ezi mwineho amatsiko g’okuzireeba omu kyanga kyaanyu omu bwiire bw’omumaisho. Mukozese orupapura ruriho empinduka ezirikukira kubaho kandi n’ebiteekateeko ebyagaambirweho aha butabo bw’okutendeka kubahwera kutoorana ebintu ebirikukirayo obukuru. Bwanyima muteere mapu y’emyaka 5-10 y’omumaisho erikworekamu ebi:

- Empinduka ezi oineho amatsiko kureeba omu kyanga kyaawe.
- Ebyanga ebindi ebi oine amatsiko kuhikaho

OKUGAMBA EBYARUGAMU

Oku Omwegyesa Aratwaaze: Ebibiina ku biraheze kuteera mapu zaabo, reeka boreeke mapu zaabo omu kibiina ekihango. Bwanyima obuuze ebibuuzo ebi:

- Ni bintu ki bimwe ebyaba nibishushana ahari mapu za boona?
- Ni biiha ebyaba bitarikushushana?

Orikukozesa ebiteekateeko ebi, hati muteere mapu emwe mweena ei murikubaasa kukozesa nk’ekanisa. Mugyezho kuteera mapu eboneire nk’oku kirikubaasika. Nimubaasa kushaba omuntu ori murungi aha kuteera ebishushani okubateerera mapu arikukozesa enshonga enkuru zoona reero mugihanike ahaiguru omu kanisa ahabw’abantu kuguma nibagireeba obutoosha.

Ekicweka B: Akacweka 2: Okugyenda Omumaisho

Enshonga Enkuru

1. Okukora enteebekanisa y'okuturahikirize ebigyendererwa byaitu nk'Ekanisa y'Obukama

Ebikozezo

1. EBISHUSHANI BY'OKUREEBERAHO: Za kaada z'ebicweka by'omubiri kuruga omu kitabo 2 – Obukama bwa Ruhanga
2. Orupapura rw'ekipande hamwe n'eby'okuhandikiisa
3. Kaada ziriho busha
4. Akatabo k'omweegi(ti eiteeka) (SG): Okuteebekanisa Okutendeka Kusya

Ebicweka byoona bigaitsirwe hamwe

OKUHAANA EBITEEKATEKO OMU KIBIINA KIHANGO

Oku Omwegyesa Aratwaaze: Kozesa **EBISHUSHANI BY'OKUREEBERAHO:** Kaada z'ebicweka by'omubiri kuruga omu kitabo 2 – Obukama bwa Ruhanga ahabw'omurimo oguri kukurataho.

Yoreka za kaada kandi obuuze ekibiina yaaba nibajuka eki baayegyeire omu eishomo omu kitabo 2.

Shoma 1 Abakorinso 12:14-20.

- Teera akashushani ngu omubiri gwaawe kukaba gutaine kimwe kya kabiri ky'ebicweka byoona. Omubiri gwaawe gukakozeire nk'oku gurikukora hati?
- N'enki ekirikubaho omubiri gwaawe ku gwaakuburwaho pacenti 20 z'ebicweka by'omubiri, kwonka okyaine pacenti 80 y'ebicweka by'omubiri??omubiri gwaawe gukabaasa kukora gye?

Nitwetenga ebicweka by'omubiri byoona kukora gye kugira ngu tubaase kuba ab'omugasho. Buri omwe omuriitwe aine omurimo omu kwombeka obukama bwa Ruhanga. Eki nikimanyisa ngu ti bebembezi bonka abeine omugasho. Emirimo yaitu nebaasa kugira omutaano, konka ekintu kikuru munonga n'okugira ngu nitwetenga kukora omurimo gwaitu kurungi; kyaaba kitari kityo omubiri gw'ekanisa nigwaija kuburwa eki gurikwetenga kandi guremwe kukora gye.

Shoma Abaefeso 4:15-16.

- N'enki ebirikuzarukamu yaaba buri kicweka ky'omubiri nikikora gye?

Oku nikwo kworekwa kwaito – omubiri gw'ekanisa y'amagara marungi ahu buri muntu arikwenyigiramu kukora okukunda kwa Ruhanga kandi n'okwombweka obukama bwa Ruhanga na rukundo. Twaaba omu mazima nitwenda kureeba eki nikibaho, nitwetenga kukora enteebekanisa nk'ekanisa y'oku turagumizemu turi kukura. Hariho ebicweka bishatu bikuru by'okutaho omutima:

1. **Okutendeka** – Ba memba b'ekanisa yaitu nibaija kugumizamu nibakura bata omu kumanya n'okwetegereza?
2. **Ebikorwa bya Rukundo** – Nitwaija kugumizamu tuta turikworeka rukundo ya Ruhanga omu kyanga kyaitu n'ebindi byanga ebitwehinguririze?
3. **Okuguma Omuriwe** – Nitwaija kusherura tuta okuguma omuri Kristo kandi tukamwegamira nk'omubiri gw'ekanisa?

Okutendeka

OKUHAANA EBITEEKATEEKO OMU KIBIINA KIHANGO

Omu eishomo 9 – Okuhindura abandi abeegi, ni miringo ki emwe ei twegeyre omu kuhindura abandi abeegi?

Amakanisa maingi nigagamba ngu gakuziire ahabwa puroguramu ya TCT obwo abantu baingi baarikwija ahari Kristo kandi n’abaikiriza abandi baatandiika kwaija obutoosha. Ruhanga asiimwe! Kwonka, ni kikuru ngu aba baikiriza basya hamwe na bamemba b’ekanisa beege eki kirikumanyisa okworobera Ruhanga omu magara gaabo goona. Hariho emiringo ebiri ei turikwetenga kukoramu eki—okukorera hamwe kandi n’okwegyesa.

Okukorera hamwe – Ni kikuru munonga okureetamu abaikiriza basya omu kukora ebikorwa bya Rukundo nk’ekanisa. Ogu ni gumwe aha miringo mirungi y’okubahwera kukura omu kwikiriza hamwe n’okworoba.

- Ni bangahi abaikiriza basya hamwe na bamemba abandi abegeitsire omu kanisa yaanyu omu myaka 5 ey’enyima?
- Ni miringo ki hati ei bariyo nibahindurwamu abeegi?
- Nibakira kwenyigiira omu bikorwa bya rukundo ebirikukorwa ekanisa? Ahabw’enki nari ahabw’enki ingaaha?
- Okabaasa kubahwera ota kugira ngu benyigyiiremu munonga?

OKUHAANA EBITEEKATEEKO OMU KIBIINA KIKYE

Okwegyesa n’omuringo gwa kabiri ogu turikubaasa kuhinduramu abeegi abaiikiriza basya hamwe na ba memba b’ekanisa. Eki nikihwera ba memba abatwiire omu kanisa abakubaasa kuba baataratendekirwe omu TCT.

Oku Omwegyesa Aratwaaze: *Handiika aharuhabo orukarara gw’ebitabo nari ebicweka by’okutendeka kwa TCT*

- Okwanjura kw’obuhereza obwijwiire
- Obukama bwa Ruhanga
- Amazima ga Ruhanga hamwe n’ebishuba bya Sitaane
- Eby’amagara
- Obuhwere hamwe n’okukuza abaana
- Eby’okureeberera esente
- Eby’obuhingi(okubyaara n’okutunga)
- Okubuurira engiri

Omu bubiina bukye, mureebe aha rukarara oru reero muhaane ebiteekateeko aha bibuuzo ebi:

- Ni biiha omuri ebi ebireetsireho empinduka mpango omu kanisa yaanyu?
- Ni biiha omuri ebi eby’orikuteekateeka ngu nibibaasa kuyamba mwagarukamu kubyegyesa omu kanisa yaanyu?
- Ni bibiina ki by’abantu omu kanisa yaanyu ebirikubaasa kuganyirwa munonga kuruga omu kutendeka oku?
 - *Eby’okureeberaho – eminyeeto, abakazi, abashaija, abaikiriza basya nari ba memba basya b’ekanisa, ebibiina by’okweega Baibuli, sande sikuulu n’ebindi.*

OKUGAMBA EBYARUGAMU

OKUHAANA EBITEEKATEEKO OMU KIBIINA KIHANGO

Oijuke ngu EKICWEKA A ky’okutendeka oku kyeine amashomo g’eshaaha 1 agu orikubaasa kugaruka kwegyesa omu kanisa yaawe omu bibiina bitarikushushana, amashomo aga garimu enshonga nkuru munonga kuruga omu bitabo 1-3.

Eby'amagara, obushwere n'okukuza abaana, eby'okureeberera esente, obuhingi n'okutunga hamwe n'okubuurira byoona n'okutendeka kw'okutunga obukugu. Nibyegeya obukugu bw'okubandizaho. Ekanisa yaawe yaaba neyetegereza obukugu obu bw'okubandizaho, obwo nimuba mweteeekateekire kweega ebiri kwongyeraho. Eky'okureeberaho, ekanisa yaaba neeta omunkora eby'amagara, obwo nibabaasa kuganyirwa omushaho yaija kubegyesa ebindi eby'okumanya ahaby'amagara. Nari baaba nibata omunkora obukugu bw'okuhinga n'okutunga, nibabaasa kweenda okutendeka okundi okurikukwaata aha kuhinga ekihingwa kisy ekrirureeta esente. Abantu bamwe nibabaasa kuganyirwa kuruga omu kutendeka kw'okushubura kuye, nari obundi bukugu burikukwaata aha mibereho.

- Ni kutendeka ki kw'obukugu busya okwakubaasa kugasira ekanisa yaanyu? Kora orukarara aharubaho.
- Ahabwa buri muringo gw'okutendeka ogwaahandiikwa, teekateeka aha muntu owu orikubaasa kushaba kwaija kubatendeka
 - Hariho abakugu obu orikumanya nka abashaho, abahumuriza nari abeby'obuhingi n'oburiisa?
 - Ebitongore ebitori bya gavumenti ebibari haihi nari gavumenti nibihereza okutendeka oku?
 - Hariho omuntu owu murikubaasa kuhikaho orikumanya okutendeka kwoona okuriho?

Oku Omwegyesa Aratwaaze: Shoma kuraba omu kuteebekanisa okutenda kusya. Gyezaho kureeba ngu ekibiina nikihurira kyeine obumanzi bw'oku bakubaasa kubugana omuntu w'aheeru nari ekibiina kushaba okutendeka.

Okuteebekanisa Okutendeka Kusya (SG)

Abakugu hamwe n'ebitongore obutoosha nibenda kumanya ngu okuhereza okutendeka nikyaija kuba okukozesa gye obwiire bwaabo n'amaani. Nibenda kumanya ngu okutendeka nikwaija kuba kuteebekanisibwe gye kandi ngu nihabaasa kubaho ebyazarukamu birungi. Hanu hariho engyendererwaho nkye ez'okwikiririsa ebibiina by'aheeru kwaija kutendeka aha kanisa yaanyu:

1. **Bagana emwe aha migane ekwatsire aha kanisa yaanyu oku etwiire erikukora omu kyanga.** Reebeka ngu waatamu emigane erikworeka okuganyirwamu kw'ekyanga kyoona hatari ba memba b'ekanisa yaanyu kyonka. Eki nikikuru na munonga waaba noshaba omuntu otari mwikiriza nari ekibiina kwaija kubatendeka. Nibenda kwaija kumanya ngu okukwatanisa n'ekanisa nikwaija kureetaho empinduka nungi ahabw'ekyanga kyoona.
2. **Shoborora ni baaha ab'orikwaija kutoorana kwaija omu kutendekwa kandi ahabw'enki.** Abakugu b'aheeru hamwe n'ebitongore nibenda kumanya ngu abantu abarikwaija omu kutendekwa kwabo n'abantu abahikire. Eky'okureeberaho tookahereza okutendeka aha kushoha eby'enyanja aha kibiina ky'abahingi, nari okutendeka aha bwebembezi yaaba ababembezi b'ekanisa yaanyu batarikubaasa kubaho. Noyenda kutoorana abantu abarikubaasa kuta gye omunkora kandi bakabagana ebi barikweega. Ebitongore byingi nibisiima kumanya ngu oteekateekire aha bintu kandi oine enteebekanisa eshoborokiire. Nibabaasa kuba baine ebiteiso konka ni kirungi kuba oine ebiteekateeko byaawe by'okworeka.
3. **Oyeteebekanise gye.** Tunga omuntu omwe oragiire obujunanizibwa bw'okugamba enteebekanisa gye n'omuntu w'aheeru nari ekibiina. Shaba abeegi kwaija omu bwiire. Tunga ebikozeso ebirikwetengwa omu kutendeka nari eby'okurya nari eby'okunywa bukiri kare. Omukoro oguteebekanisibwe gye nigwaija kworeka ekishushani kirungi aha mukugu w'aheeru, kandi babaasa kwenda kukora naimwe omu biro by'omumaisho.

Kora Enteebekanisa

Nk'ekibiina kihango, mukore orukarara rw'ebigyendererwa by'okutendeka okuri kukuru ahabw'ekanisa yaanyu kutunga omu myaka ebiri erikwaija. Nibibaasa kuba okugarukamu aha kwegyesa kwa TCT nari okutendeka kusya. Shoboorora gye ni bibiina ki omu kanisa ebirikubaasa kuganyirwa omuri buri kutendeka. Waaheza,

muhaane ebiteekateeko nari muteere akaruru aha bigyendererwa ebi murikwenda kuhikiriza omu myaka 2 erikwaija. Mubihandiike aha kipande. Mugambeho omu bugufu nooha oine obujunanizibwa ahari buri kutendeka.

Ebikorwa bya Rukundo

OMURIMO OMU KIBIINA KIHANGO

Reeba ahari mapu ei mwaateire ey'ekyanga kyanyu hamwe n'ebyangana ebibehinguririze. Ni mpinduka ki zoona ezi mwabaire nimwenda kureeba nizibaho omu biro by'omumaisho.? Handiika buri emwe ahari kaada. Hariho empinduka ezindi ezi mwineho amatsiko kureeba ezitahandikiirwe?

Toorana za kaada ozite omu birundo ebi: ebikuru munonga, ebikuru, ebitari bikuru. Ahabwa kaada eziri nkuru munonga, oteho obumanyiso bushatu. Ahabwa kaada eziri nkuru, oteho obumanyiso bubiri. Ahabwa kaada ezitari nkuru, oteho akamayiso kamwe.

Za kaada oshube ozite hamwe kandi ozitoorane kurugirira oku ekizubu kyanguhi kukoraho. Ekyanguhi kukoraho, kake kake hamwe n'ekigumire kukoraho. Ahari za kaada ezanguhi kukoraho, oteho obumanyiso bushatu, za kaada za kake-kake, oteho obumanyiso bubiri kandi za kaada ezigumire kukoraho, oteho akamayiso kamwe.

Ronda za kaada zoona eziine obumanyiso mukaaga 6(nari 5 haaba hatariho kaada eine obumanyiso 6.) ezi nizo za kaada eziri nkuru munonga kandi ezanguhi kuhikirizibwa. Kora ekindi kipande ohandiikeho empinduka ezi zoona.

OKUHAANA EBITEEKATEEKO OMU KIBIINA KIKYE

Omu bubiina bukye, mushabe hamwe kandi muhaane ebiteekateeko. Ni bikorwa ki bya rukundo ebi ekanisa yanyu erikubaasa kukora aha mpinduka ezi?

OKUGAMBA EBYARUGAMU

Obwiire ku buraabehe, toorana ekikorwa kimwe kya rukundo kandi okore enteebekanisa y'obu murakikore.

Okuguma Omuriwe

Omu eishomo 11 tukagamba oku twaakubaasa kuhikiriza ebintu ebi byoona. Eky'okugarukamu kikaba kiri kiiha?

- Okwegamira Yesu kandi n'okuguma Omuriwe.

Shoma Yohaana 15:5.

N'obu tugambire oku turikuta omunkora eki omu magara gaitu, nitwetenga kureeba oku turikwegamira Yesu nk'omubiri gw'ekanisa.

- Ni miringo ki ei ekanisa yaanyu yoona erikusherura kwegamira Ruhanga?
- Bury'omwe naayenyigiramu?
- Ekanisa yaanyu nebugana obutoosha kushaba n'okusiiba ahabw'ebizibu by'omu kyanga?
- Yaaba nikwo kiri. Oreebire ki ekirikubaho ekirikuruga omu bwiire bw'okushaba n'okusiiba hamwe?
- Ekanisa yaanyu nebaasa kukora ki omu mwaka ogurikwaija kutandiika kwegamiira Ruhanga n'okukiraho?

OKUSHABA OMU BUBIINA BUKYE

Reeba aha bipande bishatu-mapu ensya, ebigyendererwa by'okwegyesa hamwe n'orukarara rw'empinduka nkuru munonga kandi ezanguhi. Mutwaare obwiire kushaba omu bubiina bukye kugira ngu Ruhanga abahwere kubihikiriza ahabw'ekitinisa kye. Bwanyima y'okushaba, bagana n'ekibiina ekihango ebiteekateeko bisya ebyakwijaho.

Entambwe erakurateho neeha?

Tabaruka! Waahika aha kutendeka kw'ahamuheru pkwa puroguramu ya TCT. Teekateeka aha miringo yona ei ekanisa yaawe n'ekyanga bihindikiiremu kandi bikakura omu myaka mikye ehingwiire. Ruhanga ni murungi munonga!

Ebipande bishatu ebi mwakora n'ebikwaato by'okubahwera kugumizamu nimukura kandi mukahereza Ruhanga ekitinisa. Nituhabura ngu mibihanike omu kanisa nk'eky'okubaijutsya buriiho kuguma nimukura murikworekyerera ebigyendererwa byaanyu. Mwaaherize kutunga bingi munonga, kandi ku muragume nimwegamira Ruhanga kandi mukasherura okworoba, obwo n'ebindi nibyaija kubaho.

Omu myaka mikye y'omumaisho, nitwaija kuguma nitukwatanisa okubahereza ebindi bikozezo by'okuhwera omu kweega. Twine amatsiko ngu nimuza kugumizamu nimubugana hamwe kandi murikukora ebikorwa bya rsukundo. Mugumizemu nimuta omunkora eki Baibuli erikwegyesa omu magara gaanyu goona. Mugumizemu nimusherura obwengye bwa Ruhanga n'obuhwezi bwe mwaaba nimwenda kumanya oku murareeteho empinduka omu byanga.